

Prospekti i Fondit të Investimit “Albsig Standard”

Emërtimi i Fondit: “Fondi i Investimit Albsig Standard” (në vijim “Fondi”)

Forma Ligjore: Fond Investimi-Sipërmarrje me pjesëmarrje të hapur - Sipërmarrje e Investimeve Kolektive me ofertë publike e veçantë e krijuar në Republikën e Shqipërisë bazuar në Ligjin nr. 56/2020, “Për Sipërmarrjet e Investimeve Kolektive” (në vijim “Ligji”)

Shoqëria Administruese: ALBSIG INVEST Sh.a - Shoqëri Administruese e Fondeve të Pensionit dhe Sipërmarrjeve të Investimeve Kolektive (në vijim “Shoqëria Administruese”) e regjistruar në regjistrin tregtar me NIPT L92208025J, me seli në adresën: Rruga e Barrikadave, Albsig HQ, Kati 8, Tiranë, Shqipëri

Data e Krijimit: Fondi është themeluar më datë 30/12/2019, me licencimin nga AMF-ja, me vendim nr. 255. Fondi është krijuar për një afat të pacaktuar dhe ka filluar veprimtarinë e tij më 14/02/2020.

Adresa ku mund të gjendet Prospekti i Fondit, KIID (Informacioni Kryesor për Investitorin), rregullat e Fondit dhe Pasqyrat Financiare vjetore dhe të ndërmjetme: Prospekti i Fondit, KIID, rregullat e Fondit dhe Pasqyrat Financiare vjetore dhe të ndërmjetme mund të gjenden në adresën, Rruga e Barrikadave, Albsig HQ, Kati 8, Tiranë, Shqipëri.

Të gjitha informacionet dhe dokumentet e mësipërme janë gjithashtu të disponueshme falas në faqen e internetit: www.albsiginvest.al

Klasat e Kuotave	Kodi Referencë i Fondit	Trajtimi i të Ardhurave	Monedha Bazë	Investitorët e Synuar
Vetëm një klasë kuote	FI-B5	Të ardhurat janë kumulative	Lekë	Të gjithë investitorët

Data e Publikimit: 19.05.2026

TABELA E PËRMBAJTJES

1. INFORMACIONE TË PËRGJITHSHME	5
2. PËRKUFIZIME	6
3. SHOQËRIA ADMINISTRUESE	8
3.1. Forma Ligjore	8
3.2. Fondet nën Administrim	8
3.3. Organet Drejtuese të Shoqërisë Administruese	9
3.3.1. Asambleja e Aksionarëve	9
3.3.2. Këshilli i Administrimit	9
3.3.3. Administratorët dhe Personeli Kyç	10
4. DELEGIMI I DISA FUNKSIONEVE TË SHOQËRISË ADMINISTRUESE TEK PALËT E TRETA	10
5. FONDI I INVESTIMIT	11
5.1. Politika e Investimit	11
5.2. Alokimi Strategjik	12
5.3. Performanca e Fondit	13
6. FAKTORËT E RREZIKUT	13
6.1. Informacion i Përgjithshëm	13
6.2. Rreziqet e Lidhura me Investimin	14
6.3. Rreziqet e Lidhura me Shoqërinë Administruese	16
6.4. Rreziqet që Ndikojnë te Investitorët dhe Shoqëria	17
7. TË DREJTAT NGA KUOTAT E FONDIT	18
8. MËNYRA DHE KUSHTET E BLERJES APO SHLYERJES SË KUOTAVE	18
8.1. Blerja e Kuotave	18
8.2. Shlyerja e Kuotave	20
9. PEZULLIMI I SHITJES DHE SHLYERJES SË KUOTAVE TË FONDIT	21
10. KËMBIMI I KUOTAVE	22
11. TRANSFERIMI I KUOTAVE TË FONDIT	22
12. HUMBJA E JETËS SË ANËTARIT	22
13. BASHKIMI DHE MBYLLJA E FONDIT	22
13.1. Bashkimi i Fondit me një Fond Tjetër	22
13.2. Kërkesa për Likuidim Vullnetar dhe Procedura e Likuidimit	23
13.3. Procedura e Mbylljes nga Transferimi i Fondit	23
14. PËRLLOGARITJET DHE FREKUENCA E VLERËSIMIT TË ASETVE, VLERËS NETO TË ASETVE DHE ÇMIMIT	24
15. PUBLIKIMI I TË DHËNAVE DHE INFORMIMI I INVESTITORËVE	24
16. TRAJTIMI FISKAL I FONDIT DHE INVESTITORIT	25

17.	TARIFAT E SHOQËRISË ADMINISTRUESE	25
17.1.	Tarifa e Hyrjes dhe e Largimit	25
17.2.	Tarifa Vjetore e Administrimit	25
17.3.	Tarifa të Tjera	26
18.	DEPOZITARI.....	26
19.	EMRI DHE SELIA E AUDITUESIT TË JASHTËM.....	28
20.	VITI FINANCIAR.....	28
21.	INFORMACIONI PLOTËSUES.....	28
21.1.	Etika dhe Konflikti i Interesit.....	29
21.2.	Statusi FATCA.....	29
21.3.	Ankesat	29
21.4.	Shkëmbimi Automatik i Informacionit të Llogarive Financiare	29
21.5.	Ekzekutimi Optimal i Transaksioneve në Tregun e Kapitaleve.....	29
	ANEKSI 1: RREGULLAT E “FONDIT TË INVESTIMIT ALBSIG STANDARD”	31
	ANEKSI 2: DEKLARATA E KUJDESTARISË.....	37
	ANEKSI 3: FORMULA TIP E BLERJES SË KUOTAVE NË “FONDIN E INVESTIMIT ALBSIG STANDARD”	38

1. INFORMACIONE TË PËRGJITHSHME

Fondi i Investimit Albsig Standard (në vijim: "Fondi") është një Sipërmarrje Investimesh Kolektive me ofertë publike, e veçantë dhe me pjesëmarrje të hapur, e themeluar nga Shoqëria Administruese Albsig Invest sh.a. (në vijim: "Shoqëria Administruese"), e licencuar nga Autoriteti i Mbikëqyrjes Financiare (në vijim: "AMF"), për të administruar Fonde të Pensionit Vullnetar dhe Sipërmarrje të Investimeve Kolektive. Shoqëria Administruese e zhvillon aktivitetin e saj në Republikën e Shqipërisë. Shoqëria Administruese është subjekti juridik qeverisës i Fondit, që e administron dhe e përfaqëson atë me palë të treta.

Sipërmarrja e Investimeve Kolektive me ofertë publike, ose fondi i investimit është një grupim i veçantë asetesh, pa personalitet juridik, i krijuar në bazë të një marrëdhënie kontraktuale, pas licencimit nga AMF-ja, dhe i administruar nga Shoqëria Administruese, me qëllim grumbullimin e asetëve monetare ose të ngjashme, nëpërmjet ofertës publike të kuotave të Fondit. Fondi investon në asete të përcaktuara në këtë Prospekt me qëllim realizimin e përfitimeve për mbajtësit e kuotave. Fondet e investimit në krahasim me investimet në mënyrë individuale, i ofrojnë investitorëve diversifikimin e investimeve. Mbajtësit e kuotave, në varësi të kuotave të tyre, kanë të drejtën të marrin pjesë në mënyrë proporcionale në fitimet e Fondit, por dhe të kërkojnë në çdo kohë shlyerjen e tyre pa prishur fitimin e akumuluar deri në atë periudhë.

Ky Prospekt përmban informacionin kryesor në lidhje me Fondin në mënyrë që investitorët potencialë të bëjnë vlerësimin nëse toleranca e tyre për rrezik përputhet me rrezikun që përmban Fondi. Çdo investitor duhet të lexojë këtë Prospekt para se të investojë në Fond. Prospekti përmban të gjithë informacionin e nevojshëm që i duhet një investitori për të gjykuar nëse duhet të investojë në Fond. Pjesë thelbësore e Prospektit është Politika e Investimit e cila tregon se në çfarë asetesh do të investojë Fondi dhe llojet e rreziqeve të lidhura me investimin në Fond. Fondi investon kryesisht në obligacione të Republikës së Shqipërisë. Investimet do të kryhen në përputhje me ligjin nr. 56/2020 "Për Sipërmarrjet e Investimeve Kolektive" dhe rregulloret në zbatim të tij, duke respektuar kufizimet ligjore dhe parimin e diversifikimit të rrezikut.

Investitorët duhet të kontaktojnë dhe të disponojnë një Prospekt vetëm nga persona të autorizuar nga Shoqëria Administruese. Nëse i njëjti informacion është paraqitur nga persona të paautorizuar atëherë ky informacion nuk duhet të përdoret për të ndërmarrë investime në Fond. Shoqëria Administruese ka treguar kujdesin maksimal në paraqitjen sa më të saktë, të ndershme, shteruese dhe kuptimplotë të të gjithë informacionit dhe se nuk ka anashkaluar asnjë informacion të nevojshëm që i duhet një investitori për të gjykuar mbi investimin e tij në Fond.

Prospekti nuk shërben si ftesë për të blerë kuota, por shërben si mjet informues lidhur me tiparet, karakteristikat dhe rreziqet e lidhura me pjesëmarrjen në Fond.

2. PËRKUFIZIME

AMF - Autoriteti i Mbikëqyrjes Financiare;

Asete - letra me vlerë, para dhe pasuri të tjera, të cilat janë në pronësi të anëtarit të Fondit të Investimit;

Bursë titujsh - është një bursë titujsh e licencuar nga AMF-ja;

Depozitari - banka e nivelit të dytë, e licencuar nga Banka e Shqipërisë, për të ofruar shërbime kujdestarie, depozitimi dhe të besimit si dhe e licencuar nga AMF-ja, për të ofruar shërbime depozitimi për asetet e Fondit të Investimit;

Diversifikim i portofolit - investim i aseteve në instrumente të ndryshme për të zvogëluar rrezikun nga investimi;

Duration (kohëzgjatja) - tregues i rrezikut nga normat e interesit, i cili tregon ndryshimin e çmimit të një obligacioni (apo e një letre me vlerë me të ardhura fikse) nga ndryshimi i normave të interesit (apo i yield-it në maturim të këtij obligacioni);

Duration (kohëzgjatja) i portofolit - duration (kohëzgjatja) mesatar i ponderuar i obligacioneve individuale që përbëjnë portofolin e investimeve;

FATCA - ligj federal i SHBA-së, i cili u kërkon të gjithë institucioneve financiare të huaja t'i raportojnë Agjencisë së të Ardhurave në SHBA (IRS) informacionin mbi llogaritë financiare të taksapaguesve amerikanë, ose të entiteteve të huaja në të cilat taksapaguesit amerikanë zotërojnë një përqindje të rëndësishme;

Fitim/humbja nga kapitali - të ardhurat apo humbjet që rezultojnë nga ndryshimi i çmimit të letrës me vlerë;

Fondi i Investimeve - Sipërmarrje e Investimeve Kolektive e themeluar me kontratë si grupim i veçantë aktivesh, me objekt të vetëm sigurimin e kapitalit nga investitorët dhe investimin e këtij kapitali në lloje të ndryshme investimesh, sipas një politike të miratuar për investimet, me qëllim realizimin e përfitimeve për mbajtësit e kuotave të Fondit të Investimeve;

Instrumente financiare - janë instrumentet financiare të përcaktuara sipas legjislacionit në fuqi për tregjet e kapitalit;

Instrumente financiare derivative - janë kontrata midis dy palëve, vlera e së cilave bazohet në një vlerë të një aseti themelor ose të një grupimi asetesh. Asetet themelore të zakonshme janë bonot e thesarit, obligacionet, monedhat etj;

Investitor - personi fizik ose juridik që ka në zotërim kuota në një Fond Investimi;

Këshilli i Administrimit - organi i vetëm i Shoqërisë Administruese me funksione administrimi dhe mbikëqyrjeje;

Kthim nga investimi - fitimi që merret nga investimi i aseteve;

Kujdestari - ruajtja dhe administrimi i instrumenteve financiare për llogari të klientëve;

Kuotë - pjesa përpjesëtimore e pronësisë në grupin e aseteve të Fondit të Investimit, ku vlera totale e të gjitha kuotave të Fondit të Investimit është e barabartë me vlerën totale neto të aseteve të këtij Fondi;

Kuota akumulimi - kuotat e një Fondi për të cilin të ardhurat nga investimi ri-investohen automatikisht dhe përfitimet për investitorët vijnë nga akumulimi i vlerës së atyre kuotave;

Ligji për shoqëritë tregtare - është Ligji nr. 9901, datë 14.4.2008 "Për Tregtarët dhe Shoqëritë Tregtare";

Mbajtës kuotash - çdo person, i cili zotëron kuota ose aksione ose investon kapital në Sipërmarrjen e Investimeve Kolektive, i cili si rrjedhojë përfiton një pjesë përpjesëtimore të pasurisë së Sipërmarrjes;

Menaxher i portofolit - personi përgjegjës në Shoqërinë Administruese për administrimin e portofolit;
Njësia akumuluese ose kuota akumuluese - njësia ose kuota në një Sipërmarrje të Investimeve Kolektive, e cila akumulon të ardhurat nëpërmjet kreditimit periodik në kapital, në ndryshim nga shpërndarja;

Ofertë publike - ftesa për të nënshkruar tituj, e cila i drejtohet një numri të papërcaktuar personash, nëpërmjet mjeteve të komunikimit masiv;

Persona kyç - persona fizikë, të cilët, sipas dispozitave të legjislacionit ose të dokumenteve të themelimit, përfaqësojnë subjektin ose Depozitarin, ose të cilët përcaktojnë në mënyrë efektive politikën e subjektit ose të Depozitarit, përfshirë edhe anëtarët e Këshillit Mbikëqyrës apo të Këshillit të Administrimit të këtij subjekti;

Personel kyç - janë persona fizikë në poste të larta, të cilët janë përgjegjës për funksionet kyçe të shoqërisë administruese përfshirë, ndër të tjera, në rastin e subjektit operator, drejtorin e administrimit të investimeve, drejtorin e marketingut, drejtorin e burimeve njerëzore, drejtorin e auditimit të brendshëm, drejtorin e administrimit të rrezikut dhe drejtorin e përputhshmërisë;

Palë e lidhur - është personi fizik ose juridik që është i lidhur me Shoqërinë Administruese, në rrethana kur personi fizik ose drejtuesi i personit fizik apo juridik është a) anëtar i Këshillit Mbikëqyrës, i Këshillit të Administrimit ose punonjës i Shoqërisë Administruese; b) anëtar i Komitetit të Kontrollit të Shoqërisë; c) aksionar ndikues i Shoqërisë; ç) bashkëshort ose i afërm deri në shkallën e tretë të lidhjes së gjatut i një anëtari të Këshillit të Mbikëqyrjes, të Këshillit të Administrimit ose të Komitetit të Kontrollit, punonjës i Shoqërisë Administruese, aksionar ndikues i Shoqërisë Administruese, kontrollues kryesor i Shoqërisë Administruese;

Portofol - tërësia e investimeve të kryera me asetet e Fondit;

Prospekt - dokumenti i bërë publik, që përmban informacionin më të rëndësishëm për Sipërmarrjen e Investimeve Kolektive, si politika e investimit, politika e administrimit të rrezikut, etj.;

Rating (vlerësim) i letrave me vlerë - renditje e letrave me vlerë, e kryer nga Agjencitë Ndërkombëtare të Klasifikimit, sipas nivelit të rrezikut që lidhet me investimin në to dhe kthimin nga investimi;

Rregullat e Fondit - dokumenti kryesor që rregullon marrëdhënien ligjore midis Shoqërisë Administruese dhe mbajtësve të kuotave;

Sipërmarrje Investimesh Kolektive (SIK) - personi juridik ose bashkimi i posaçëm i aseteve të investitorëve, që funksionon në formën e Fondit të Investimit ose shoqërisë së investimit;

Sipërmarrje me pjesëmarrje të hapur - sipërmarrja e cila në bazë të dokumentit themelues shlyen pjesëmarrjet çdo ditë pune, sipas një çmimi të llogaritur në bazë të vlerës neto të aktiveve për pjesëmarrje të sipërmarrjes, të përcaktuara në përputhje me Ligjin;

Sipërmarrje e veçantë - sipërmarrja e investimeve kolektive që nuk është sipërmarrje ombrellë ose nënfond;

Standardi i Përbashkët i Raportimit (CRS) - përbën një kërkesë rregullatore për raportim për Institucionet Financiare të vendosura në juridiksionet pjesëmarrëse dhe ka qëllimin për të shmangur evazionin fiskal;

Shkëmbimi automatik i informacionit për llogaritë financiare (AEIFA) - Ligji nr. 4/2020, datë 30/01/2020 "Për Shkëmbimin Automatik të Informacionit të Llogarive Financiare";

Shoqëri Administruese - shoqëri aksionare, e krijuar sipas Ligjit nr. 9901/2008, i ndryshuar, dhe e licencuar nga AMF-ja, për të administruar një ose disa Fonde Pensioni dhe/ose Sipërmarrje të Investimeve Kolektive;

Shpërndarje strategjike - është shpërndarja gjatë një periudhe afatgjatë që zë çdo klasë asetë në portofol;

Tarifa e Administrimit - është komisioni që i paguhet Shoqërisë së Administrimit për menaxhimin e investimeve;

Tituj - tituj ose instrumente financiare të negociueshme që emetohen dhe tregtohen për sigurimin e fitimit, nëpërmjet administrimit të të drejtave që rrjedhin nga zotërimi i tyre. Mund të jenë tituj të pjesëmarrjes në kapital, tituj borxhi, aksione dhe kuota të Fondeve të Investimit ose Fondeve të Pensionit;

Tituj borxhi - janë obligacione të emetuara nga shtete, kompani private, apo organe të tjera;

Treg i rregulluar - çdo bursë, treg mbi banak ose çdo treg tjetër i organizuar i titujve, që vepron rregullisht, është i hapur për publikun dhe është i njohur zyrtarisht nga AMF-ja;

Tregu i parasë - Tregu i parasë i referohet tregtimit në instrumente borxhi afatshkurtra;

Vlera Neto e Aseteve - është vlera e asetëve të Sipërmarrjes së Investimeve Kolektive pas zbritjes së shumës totale të detyrimeve të Sipërmarrjes së Investimeve Kolektive në momentin e llogaritjes;

Vlera Neto e Aseteve për kuotë - vlera neto e asetëve e pjesëtuar me numrin e kuotave totale të Fondit. Vlera Neto e Aseteve për kuotë quhet ndryshe dhe çmimi i kuotës në ditën e vlerësimit.

3. SHOQËRIA ADMINISTRUESE

3.1. Forma Ligjore

Shoqëria Administruese Albsig Invest sh.a është një shoqëri aksionare, e krijuar në përputhje me ligjin për shoqëritë tregtare, e regjistruar në Qendrën Kombëtare të Biznesit në regjistrin tregtar me NIPT: L92208025J, e licencuar nga AMF-ja për të administruar fonde të pensionit vullnetar dhe kryerjen e pagesave të pensionit, si dhe për administrimin e sipërmarrjeve të investimeve kolektive me ofertë publike, me seli në adresën: Rruga e “Barrikadave”, Albsig HQ, Kati 8, Tiranë, Shqipëri.

Aksionari i vetëm i Shoqërisë Administruese është Shoqëria e Sigurimit “Albsig Jetë” sh.a, i cili zotëron 100% të aksioneve. “Fondi i Investimit Albsig Standard” nuk mbështetet apo garantohet në çfarëdo lloj forme nga Shoqëria e Sigurimit “Albsig Jetë” sh.a, dhe rreziku i investimit i përket tërësisht investitorit.

Kapitali i regjistruar i Shoqërisë është 69,000,000 lekë.

Emri ligjor i shoqërisë është: Albsig Invest sh.a - Shoqëri Administruese e Fondeve të Pensionit dhe Sipërmarrjeve të Investimeve Kolektive.

Albsig Invest sh.a ka si objekt të aktivitetit të saj:

1. Mbledhjen, investimin dhe kryerjen e pagesave për pension të fondeve të pensioneve, në përputhje me dispozitat ligjore, si dhe bazuar në licencën nr. 5, datë 22.11.2019, të miratuar me vendimin nr. 210 nga AMF-ja;
2. Krijimin dhe administrimin e sipërmarrjeve të investimeve kolektive në përputhje me dispozitat ligjore, si dhe bazuar në licencën nr. 5, datë 22.11.2019, të miratuar me vendimin nr. 210 nga AMF-ja.

Shoqëria Administruese gjatë aktivitetit të saj udhëhiqet nga parimet e qeverisjes së mirë, prioriteti i interesit të klientëve, integritetit, profesionalizmit, ligjet dhe rregulloret që bien mbi të.

3.2. Fondet nën Administrim

Shoqëria Administruese Albsig Invest sh.a. administron Fondet e mëposhtme:

1. Fondin e Pensionit Vullnetar Albsig miratuar nga AMF-ja me vendimin nr. 210, datë 22.11.2019.

2. Fondin e Investimit Albsig Standard miratuar nga AMF-ja me vendimin nr. 255, datë 30.12.2019.
3. Fondin e Pensionit Vullnetar Smart Pension miratuar nga AMF-ja me vendimin nr. 96, datë 28.04.2022.

3.3. Organet Drejtuese të Shoqërisë Administruese

Organet drejtuese të Shoqërisë Administruese janë: Asambleja e Aksionarëve, Këshilli i Administrimit dhe Administratorët.

3.3.1. Asambleja e Aksionarëve

Asambleja e Aksionarëve përbëhet nga përfaqësuesi ligjor i aksionarit të vetëm të Shoqërisë së Sigurimit “Albsig Jetë” sh.a.

3.3.2. Këshilli i Administrimit

Këshilli i Administrimit është organi qëndror i Shoqërisë Administruese, i cili kontrollon dhe mbikëqyr zbatimin e politikave tregtare dhe zhvillimin e biznesit të Shoqërisë Administruese. Ai kujdeset që Shoqëria Administruese të respektojë ligjin dhe standardet e kontabilitetit, miraton politikat financiare, të investimit, Prospektin etj. Këshilli përbëhet nga 5 (pesë) anëtarë si më poshtë:

1. Z. Irfan LAMI: Kryetar i Këshillit të Administrimit

Z. Irfan Lami ka karrierë të gjatë në fushën financiare prej vitit 1995. Z. Lami ka eksperiencë disavjeçare pranë ISSH në fushën e pensioneve, financës dhe auditimit. Ka eksperiencë mbi 18 vjeçare në menaxhimin financiar dhe drejtimin e shoqërive të sigurimeve në Shqipëri dhe Kosovë. Prej vitit 2015 është Drejtor i Departamentit të Financës së Shoqërisë së Sigurimit Albsig Sh.a. Z. Lami zotëron diplomë universitare të integruar të nivelit të dytë në Financë nga Universiteti Bujqësor i Tiranës, që nga viti 1995. Z. Lami ka kryer trajnime të shumta në fushën e menaxhimit financiar dhe të administrimit të rrezikut.

2. Z. Dritan KASTRATI: Anëtar i Këshillit të Administrimit

Z. Dritan Kastrati ka një eksperiencë disavjeçare pranë Byrosë Shqiptare të Sigurimeve, si specialist i trajtimit të dëmeve, sekretar i Asamblesë së Përgjithshme të Anëtarëve/Komisioneve dhe administrimit të praktikave të BSHS. Z. Kastrati prej vitit 2015 është pjesë e Shoqërisë së Sigurimit Albsig sh.a si Drejtor i Departamentit të Dëmeve dhe Zëvendës Drejtor i Përgjithshëm. Z. Kastrati zotëron diplomë Master në Administrim Publik nga Universiteti “Aleksandër Moisiu”, Durrës. Z. Kastrati ka kryer trajnime të shumta në fushën e menaxhimit (publik dhe të shoqërive private), të sigurimeve, trajtimit të dëmeve dhe administrimit të rrezikut.

3. Z. Elvis BEQIRI: Anëtar i Këshillit të Administrimit

Z. Elvis Beqiri prej vitit 2017 është pjesë e Shoqërisë së Sigurimit Albsig sh.a si Drejtor i Sigurimit të Përgjegjësive. Z. Beqiri ka një eksperiencë 14 vjeçare në fushën bankare në pozicione të ndryshme si Drejtor Departamenti, Drejtues Dege, etj. Z. Beqiri zotëron diplomë Master në Administrim Biznesi (MBA) nga Universiteti Polis dhe IPAG Business School, Paris. Z. Beqiri ka kryer trajnime të shumta në fushën e menaxhimit dhe financës.

4. Z. Elton KORBI: Anëtar i Këshillit të Administrimit

Z. Elton Korbi është aktualisht Administrator i Përgjithshëm i Shoqërisë Administruese Albsig Invest sh.a. Z. Korbi ka një eksperiencë mbi 13 vjeçare në sektorin bankar në banka tregtare dhe në Bankën e Shqipërisë, në fushën e auditimit, mbikëqyrjes, kontabilitetit dhe analizës financiare. Z. Korbi zotëron diplomë universitare të integruar të nivelit të dytë në Financë nga Universiteti i Tiranës si dhe diplomë Master në Administrim Biznes (MBA) nga Universiteti Epoka. Z. Korbi nga viti 2015 është duke ndjekur studimet për marrjen e certifikatës ACCA (*Association of Chartered Certified Accountants*). Z. Korbi ka zhvilluar trajnime të shumta në fushën e auditimit, mbikëqyrjes, menaxhimit të rrezikut, menaxhimit financiar dhe buxhetimit nga institucione prestigjioze si Banka Botërore, Fondi Monetar Ndërkombëtar, Deutsche Bundesbank, BaFIN, Banque de France, etj.

5. Z. Admir RAMADANI: Anëtar i Këshillit të Administrimit

Z. Admir Ramadani është aktualisht Drejtor i Investimeve dhe Zëvendës Administrator i Përgjithshëm i Shoqërisë Administruese Albsig Invest sh.a. Z. Ramadani ka një eksperiencë 13 vjeçare në sektorin bankar, nga të cilat 5 vite në fushën e investimeve si dhe 8 vite në fushën e menaxhimit të rreziqeve. Z. Ramadani zotëron dy diploma në Ekonomiks dhe Matematikë nga Universiteti Amerikan në Bullgari. Z. Ramadani zotëron titullin CFA (*Chartered Financial Analyst*) që nga Tetor 2012.

3.3.3. Administratorët dhe Personeli Kyç

Veprimtaria e përditshme e Shoqërisë Administruese menaxhohet nga administratorët, të cilët janë njëkohësisht edhe anëtarë të Këshillit të Administrimit. Administratorët organizojnë dhe menaxhojnë veprimtarinë e Shoqërisë Administruese, përgatisin dhe propozojnë për miratim në Këshillin e Administrimit politikat e biznesit, rregulloret dhe procedurat e brendshme, raportet e zhvillimit të biznesit si dhe raportet financiare, vendosin mbi të drejtat dhe detyrimet e punonjësve që rrjedhin nga kontratat e punës, etj.

Administratorët dhe personeli kyç janë:

1. Z. Elton KORBI, MBA - Administrator i Përgjithshëm dhe Menaxher i Rrezikut;
2. Z. Admir RAMADANI, CFA - Zëvendës Administrator i Përgjithshëm dhe Drejtor i Investimeve.




Z. Korbi është përgjegjës për njësinë e administrimit të rrezikut dhe raporton te Këshilli i Administrimit për çështje të lidhura me këtë njësi. Z. Ramadani është përgjegjës për njësinë e administrimit të investimeve dhe menaxhimit të operacioneve ditore të fondeve dhe raporton te Këshilli i Administrimit në lidhje me këto njësi.

4. DELEGIMI I DISA FUNKSIONEVE TË SHOQËRISË ADMINISTRUESE TEK PALËT E TRETA

Shoqëria Administruese ka lidhur një kontratë për delegimin e disa funksioneve të saj me Shoqërinë e Sigurimit Albsig sh.a. në mënyrë që të shfrytëzojë kapacitetet e saj të konsoliduara.

Funksionet dhe shërbimet e deleguara janë si vijon:

- ✚ Shërbimi i përputhshmërisë dhe ai ligjor;
- ✚ Shërbimet mbështetëse si burimeve njerëzore, arkiva, protokolli, dhe prokurime;
- ✚ Shërbimi i auditimit të brendshëm;
- ✚ Shërbimi i komunikimit, marketingut, marrëdhënie me publikun;

-  Shërbimi i administrimit të teknologjisë së informacionit;
-  Shërbimi i ofrimit dhe i promovimi të fondit të pensionit privat;
-  Funkzioni i parandalimit të pastrimit të parave dhe financimit të terrorizmit.

Synimi i delegimit të këtyre funksioneve të mësipërme ka të bëjë me rritjen e efektivitetit, nisur edhe nga eksperiencia e Shoqërisë së Sigurimit Albsig sh.a në treg ku dallohet për cilësinë dhe besueshmërinë e shërbimeve të saj ndaj klientëve. Pavarësisht këtij delegimi, Shoqëria Administruese mbetet përgjegjëse për këto funksione të deleguara. Shoqëria e Sigurimit Albsig sh.a ka marrë masa që të mënjanojë çdo konflikt interesi gjatë kryerjes së funksioneve të deleguara ndaj Shoqërisë Administruese Albsig Invest sh.a.

Autoriteti i Mbikëqyrjes Financiare informohet për çdo funksion të deleguar.

5. FONDI I INVESTIMIT

Në Fond mund të investojnë investitorë individualë dhe investitorë institucionale (kompanitë e sigurimit, fondet e pensionit, etj). Kohëzgjatja e rekomanduar e qëndrimit në Fond është të paktën 2 vjet. Fondi është një alternativë shumë e mirë për klientët konservatorë që kërkojnë fleksibilitet të lartë mbi kursimet e tyre. Fondi të jep mundësinë që vetëm me një kontratë të vetme mund të investosh dhe mund të tërheqësh kur dhe sa dëshiron nga shumatat e akumuluarat. Fondi është fond akumulimi, i cili i ri-investon të ardhurat e gjeneruara nga asetet e tij. Fondi ofron vetëm një klasë kuote, e cila është në monedhën lekë dhe mbart tarifën dhe komisionet e shprehura në këtë Prospekt. Ky Fond është me kohëzgjatje të papërcaktuar. Fondi nuk mbështetet në asnjë formë nga Shoqëria Administruese Albsig Invest sh.a apo Shoqëria e Sigurimit Albsig Jetë sh.a për stabilitetin e vlerës neto të aseteve apo për mbështetje likuiditeti - në këtë mënyrë rreziku i investimit i përket tërësisht investitorit.

Investimet në Fond nuk konsiderohen si depozita bankare dhe si të tilla nuk janë të siguruara nga Agjencia e Sigurimit të Depozitave (ASD). Kuotat e Fondit blihen dhe shiten vetëm në monedhën Shqiptare, lekë.

5.1. Politika e Investimit

Politika e investimit përbën elementin kryesor të Prospektit pasi marrëdhënia midis investitorit dhe Shoqërisë Administruese lind kur investitori bie dakord që investimi i tij të kryhet në klasat e aseteve që përshkruhen në këtë politikë. Shoqëria Administruese respekton të gjitha kufizimet e investimeve të parashikuara në Ligj, kufizimet e politikës së investimit dhe politikës së menaxhimit të rrezikut. Fondi do të investojë kryesisht në bono dhe obligacione të Shtetit Shqiptar dhe i adresohet klientëve konservatorë me një horizont afatmesëm investimi 2-5 vjet duke ofruar likuiditet të lartë.

Performanca e Fondit mund të luhet në varësi të ndryshimeve të normave të interesit të bonove dhe obligacioneve të Shtetit Shqiptar, të cilat ndryshojnë si rezultat i ndryshimeve të kushteve të tregut. Performanca e kaluar nuk garanton një performancë të caktuar në të ardhmen dhe Shoqëria Administruese nuk mund të garantojë një performancë të caktuar për Fondin.

Elementët kryesorë të politikës së investimit janë:

1. Objektivi: Fondi synon rritje të të ardhurave duke ruajtur principalin dhe likuiditetin;
2. Toleranca për rrezik: E ulët;

3. Horizonti i Investimit: Afatmesëm, 2-5 vjet.

Shoqëria Administruese do të synojë të ndërtojë një shpërndarje strategjike si më poshtë. Me një shpërndarje strategjike nënkuptohet se në cilat lloje asetesh, mesatarisht në një kohë afatgjatë, do të jetë i investuar Fondi. Shoqëria Administruese për të diversifikuar Fondin, ka shtuar në shpërndarje dhe tituj të emetuar nga autoritete vendore dhe shoqëri tregtare në Republikën e Shqipërisë, por në një masë të vogël, e cila nuk ndikon mbi tolerancën e ulët për rrezik që duhet të ketë Fondi. Letrat me vlerë të emetuara nga shoqëri tregtare dhe organe vendore do të jenë vetëm tituj që tregtohen në tregje të rregulluara ose në një bursë titujsh në Republikën e Shqipërisë.

Shpërndarja e synuar e shprehur si objektiv mund të ndryshojë në varësi të kushteve të tregut dhe shërben vetëm si një orientim.

5.2. Alokimi Strategjik

Nr.	Kategoria e Aseteve	Objektivi	Maksimum
1	Tituj shtetërorë të emetuar e garantuar nga Republika e Shqipërisë	90%	100%
2	Cash dhe ekuivalentë të tij	10%	80%
3	Tituj të emetuar nga autoritete vendore dhe shoqëri tregtare të tregtuara në tregje të rregulluara ose në një bursë titujsh në Republikën e Shqipërisë	0%	10%

Objektivi i investimit do të arrihet duke investuar pjesën më të madhe të portofolit në obligacione të Shtetit Shqiptar dhe duke menaxhuar duration-in (kohëzgjatjen) e tij në varësi të kushteve të tregut, duke respektuar në çdo kohë limitin e duration-it të portofolit prej 6 vjet.

Likuiditeti do të arrihet duke mbajtur në çdo kohë asete likuide me cilësi të lartë në përputhje me kërkesat e rregullores nr. 106, datë 30.06.2021 “ Mbi Investimet, Huadhënien, dhe Huamarrjen e Sipërmarrjeve të Licencuara të Investimeve Kolektive me Ofertë Publike”. Gjithashtu likuiditeti do të realizohet duke investuar një pjesë të konsiderueshme të portofolit në obligacione të ashtuquajtura “referencë” të emetuara nga Shteti Shqiptar, të cilat tregtohen rregullisht nga zhvilluesit e tregut.


Stabiliteti i principalit vjen nga rreziku më i ulët i kreditit që zotërojnë bonot dhe obligacionet e Republikës së Shqipërisë në krahasim me obligacionet e shoqërive tregtare apo instrumenteve të tjera financiare.

Rreziku i kredisë është i lidhur ngushtë me aftësinë paguese të Shtetit Shqiptar dhe është e pamundur që ai të përjashtohet plotësisht. Rreziku i kredisë do të zbutet duke diversifikuar portofolin e letrave me vlerë. Fondi do të jetë i investuar gjithmonë në të paktën gjashtë emetime të ndryshme me numra të ndryshëm ndërkombëtarë të identifikimit të titujve (ISIN) ose të barasvleshëm të tyre.

Shoqëria Administruese do të zbatojë në mënyrë rigoroz rregulloret mbi likuiditetin miratuar nga AMF-ja. Fondi do të investojë më shumë se 35% të vlerës së portofolit në bono dhe obligacione të Republikës së Shqipërisë. Fondi nuk do të nënshkruajë kontrata derivative. Instrumentet e listuara në alokimin strategjik janë në përputhje me investimet e lejuara në Ligj.

5.3. Performanca e Fondit

Për periudhën 01.01.2025-31.12.2025 fondi ka rezultuar me një normë kthimi prej 4.9% dhe një normë kthimi akumulative prej 22.07% që nga themelimi i Fondit më 14.02.2020. Tarifa e administrimit zbritet përpara llogaritjes së normës së kthimit. Vlera neto e aseteve në Fond më datë 31.12.2025 rezulton në vlerën 304,070,624.52 Lekë. Performancat e mëparshme apo performancat afatshkurtra nuk duhen përdorur si udhëzuese të performancave në të ardhmen. Investitorët janë të këshilluar të qëndrojnë në Fond për një periudhë më shumë se 2 vjeçare që Fondi të realizojë objektivat e investimit. Vizitoni faqen e internetit www.albsiginvest.al ku pasqyrohet performanca e Fondit në intervale të ndryshme kohore.



6. FAKTORËT E RREZIKUT

6.1. Informacion i Përgjithshëm

Shoqëria Administruese ka një strukturë të veçantë për menaxhimin e rrezikut, e cila kontrollon nëse investimet e Fondit kryhen brenda kufizimeve të vendosura për rreziqet. Njësia e menaxhimit të rrezikut është përgjegjëse për vlerësimin e aseteve të Fondit dhe ka ndërtuar politika dhe procedura për menaxhimin e çdo lloji rreziku që ekspozohet Fondi.

Investimi në instrumente financiare shoqërohet gjithmonë me një rrezik. Rreziku nuk mund të eliminohet plotësisht dhe investitorët janë të ekspozuar ndaj humbjeve. Çdo tip aset si obligacione, aksione apo letra të tjera me vlerë zotërojnë tipare të ndryshme rreziku. Investitori duke njohur tolerancën e tij për rrezik, zgjedh në cilin Fond të investojë duke parë se në çfarë asetesh investon ky Fond.

“Fondi i Investimit Albsig Standard” do të investojë kryesisht në bono dhe obligacione të emetuara nga Republika e Shqipërisë dhe për rrjedhojë rreziku është i lidhur ngushtë me aftësinë paguese dhe rrezikun në përgjithësi të Shtetit Shqiptar. Rreziku nga bonot dhe obligacionet qeveritare tradicionalisht vlerësohet më i ulët se obligacionet apo aksionet e kompanive private. Fondi mund të investojë dhe në tituj të emtuar nga autoritete vendore dhe shoqëri tregtare në Republikën e

Shqipërisë, të cilat kanë një rrezik kredie më të lartë se bonot dhe obligacionet e Shtetit Shqiptar, por në një masë të vogël, e cila kryhet vetëm për qëllime diversifikimi dhe ku objektivi i alokimit do të jetë 0% (zero) afatgjatë.

Pavarësisht se Fondi do të investojë kryesisht në bono dhe obligacione të Shtetit Shqiptar, të cilat kanë rrezik kredie më të ulët se asetet e tjera të tregjeve të kapitalit, ato mbartin rrezikun nga normat e interesit dhe të likuiditetit.

6.2. Rreziqet e Lidhura me Investimin

Në momentin e vendimmarrjes për investime, Shoqëria Administruese trajton çdo investim të veçantë brenda kontekstit të nivelit të përgjithshëm të rrezikut për totalin e aseteve të fondit, në përputhje me parimet e sigurisë, përfitueshmërisë, likuiditetit dhe diversifikimit të rrezikut.

a) Rreziku i Tregut

Nënkupton luhatjet e vlerave të instrumenteve financiare si pasojë e ndryshimeve të:

- i. normave të interesit;
- ii. kurseve të këmbimit.

Rritja e normave të interesit sjell ulje të vlerës së instrumentit financiar dhe ulja e normave sjell rritje të vlerës së instrumentit financiar. Luhatjet e kursit të këmbimit sjellin luhatje të vlerës së asetit të konvertuara në monedhën vendase, lekë. Fondi nuk ka parashikuar në shpërndarjen e tij asete në valutë të huaj.

Si rrjedhojë e ndryshimeve të normave të interesit, investitori në periudha afatshkurtra mund të humbasë pjesë të kapitalit. Por një karakteristikë e bonove dhe obligacioneve është se investitori do të sigurojë një normë kthimi sa niveli i normave të interesit që mbizotërojnë në treg kur kryen investimin, vetëm nëse e mban bonon apo obligacionin deri në maturim dhe nëse emetuesi (Shteti Shqiptar) nuk falimenton. Investitorët janë të këshilluar që të qëndrojnë në Fond për një periudhë të paktën 2 (dy) vjeçare që Fondi të realizojë objektivin e investimit. Njësia matëse e rrezikut nga normat e interesit është “duration” apo “kohëzgjatja”.

Duration (kohëzgjatja): Kohëzgjatja është matësi i rrezikut nga normat e interesit të një letre me vlerë me të ardhura fikse (obligacioni) që tregon ndjeshmërinë e çmimit të një letre me vlerë nga ndryshimet e normave të interesit. Sa më e madhe të jetë kohëzgjatja, aq më e madhe do të jetë ndjeshmëria dhe për rrjedhojë ndryshimi i vlerës së tregut të letrës me vlerë nga ndryshimi i normave të interesit. Një Fond me një kohëzgjatje mesatare më të lartë do të jetë më i ndjeshëm në krahasim me një Fond me një kohëzgjatje më të vogël.

Si shembull: për një Fond me një kohëzgjatje të barabartë me 4 (katër) vjet, vlera e tij do të bjerë menjëherë me 4% nëse normat e interesit rriten me 1% dhe do të rritet me 4% nëse normat e interesit bien me 1%.

Kufiri i kohëzgjatjes mesatare të Fondit do të jetë më i vogël ose i barabartë me 6 (gjashtë) vjet.

Shoqëria Administruese menaxhon rrezikun nga normat e interesit dhe likuiditetit duke përdorur strategjinë e menaxhimit të duration-it (kohëzgjatjes) të bonove dhe obligacioneve që nënkupton uljen apo rritjen e duration-it (kohëzgjatjes) në varësi të kushteve të tregut.

b) Rreziku i Kredisë

Nënkupton mospagimin nga emetuesi të interesit periodik dhe principalit. Gjithashtu përkeqësimi i aftësisë paguese të një emetuesi reflektohet te çmimi i obligacionit duke e ulur atë dhe duke ulur për rrjedhojë vlerën neto të aseteve. Përkeqësimi i aftësisë paguese të një shteti vjen zakonisht nga përkeqësimi i deficitit të tij buxhetor.

Bonot dhe Obligacionet kanë një Rating (vlerësim i letrave me vlerë) i cili reflekton një “notë” për aftësitë paguese të emetuesit. Ndryshimi i aftësisë paguese reflektohet në ndryshimin e “rating” të emetuesit.

Investimi në obligacione të Shtetit Shqiptar është i lidhur me aftësitë paguese të Shtetit Shqiptar. Fondi është i përqëndruar kryesisht te rreziku i kredisë i Shtetit Shqiptar. Tradicionalisht rreziku i kredisë vlerësohet më i ulët për obligacionet shtetërore në krahasim me asetet e tjera si obligacionet apo aksionet e shoqërive tregtare.

Tituj të emtuar nga autoritete vendore dhe shoqëri tregtare në Republikën e Shqipërisë përmbajnë rrezikun e kredisë të entitetit apo kompanisë që i emeton, dhe kryesisht vlerësohen me rrezik kredie më të lartë se bonot dhe obligacionet shtetërore. Fondi ka parashikuar një shpërndarje të vogël në këtë klasë asetit, vetëm për qëllime diversifikimi, e cila nuk ndikon përfundimisht në rrezikun total të Fondit. Gjithashtu objektivi afatgjatë i shpërndarjes në këtë lloj instrumenti është 0% (zero).

c) Rreziku i Likuiditetit

Përbën pamundësinë për të shitur asetet e Fondit në rast kur Shoqëria Administruese duhet të përmbushë detyrimet e saj për tërheqje ose rastin e shitjes së një asetit me çmim të pafavorshëm. Investimi i Fondit në asete jo-likuide mund të sjellë ulje të normës së kthimit kur asetit shitet me një çmim të pafavorshëm.

Shoqëria Administruese do të zbatojë në mënyrë rigoroze limitet për administrimin e likuiditetit sipas rregullores nr. 106, datë 30.06.2021 “Mbi Investimet, Huadhënien, dhe Huamarrjen e Sipërmarrjeve të Licencuara të Investimeve Kolektive me Ofertë Publike”, e miratuar nga AMF-ja.

d) Rreziku i Palës Tjetër

Shoqëria Administruese në emër të Fondit kryen transaksione ose transfera me palë të tjera, të cilat mund të mos kryhen apo të kryhen me vonesë si pasojë e moszbatimit të kushteve të marrëveshjes mes palëve.

e) Rreziku i Mosdiversifikimit

Fondi do të investojë kryesisht në bono dhe obligacione të Shtetit Shqiptar dhe është i ekspozuar nga rreziku i mosdiversifikimit. Kjo mund të sjellë luhatje të mëdha në performancën e Fondit, pasi bëhet më i ndjeshëm ndaj çdo përkeqësimi të aftësisë paguese të Shtetit Shqiptar.

f) Rreziku i Shlyerjeve të Mëdha

Shlyerjet e mëdha mund të vendosin në vështirësi Fondin nëse ai është i detyruar të kryejë shitje të një pjese të madhe të portofolit. Shitjet e detyruara në vlera të mëdha kryhen me çmime të pafavorshme të cilat sjellin humbje për Fondin.

6.3. Rreziqet e Lidhura me Shoqërinë Administruese

g) Rreziku Operacional

Përbën humbjet e mundshme nga gabime apo keqfunksionime të sistemeve të brendshme apo procedurave të Shoqërisë Administruese.

Shoqëria Administruese ndërton sisteme kontrolli të brendshme dhe procedura duke parandaluar rrezikun e humbjeve të Fondit të shkaktuara nga gabime njerëzore ose të sistemeve brenda Shoqërisë Administruese, nga ekzistenca e proceseve të brendshme të papërshtatshme, nga gabime ligjore ose të dokumentacionit, si dhe nga procedurat e tregtimit, të vlerësimit dhe pagesave në emër të Fondit. Shoqëria Administruese për të administruar Fondin përdor një sistem operativ, i cili është ndërtuar duke respektuar parimin e 4 (katër) syve.

Gjithashtu Banka Depozitare kontrollon aktivitetin e investimeve dhe të transaksioneve me investitorët (investimet dhe shlyerjet).

h) Rreziku i Përputhshmërisë

Shoqëritë Administruese të Fondeve të Pensionit dhe të Sipërmarrjeve të Investimeve Kolektive operojnë në një treg shumë të rregulluar. Si të tilla ato janë të ekspozuara nga rreziku i mospërmbushjes së akteve ligjore apo i rregulloreve që bien mbi to. Ky rrezik mund të sjellë efekte negative për shkak të moszbatimit të rregulloreve, kryesisht ato që rregullojnë nivelin e kapitalit dhe parandalimin e pastrimit të parave.

Shoqëria Administruese ka ndërtuar bazën e plotë rregullatore të brendshme për të shmangur rrezikun e përputhshmërisë. Banka Depozitare gjithashtu kontrollon aktivitetin e investimeve dhe të transaksioneve me investitorët (investimet dhe shlyerjet) nëse ai është në përputhje me rregulloret dhe Prospektin.

Shoqëria Administruese ka ndërtuar një sistem solid të vlerësimit periodik të asetëve, humbjeve të mundshme dhe mundësisë së rritjes së kapitalit. Në të njëjtën kohë do të informojë çdo Anëtar të Fondit në mënyrë elektronike për rregullat e parandalimit të pastrimit të parave dhe financimit të terrorizmit.

i) Rreziku i Agjencisë

Rreziku i agjencisë ndodh kur administratorët e Shoqërisë Administruese apo dhe menaxherët e portofolit nuk marrin vendim për rritjen e fitimit afatgjatë të Shoqërisë Administruese apo në shërbim të klientit, por nisen nga synimet e tyre personale afatshkurtra.

Shoqëria Administruese ka ngritur rregullore të brendshme, të cilat vendosin rregulla mbi sjelljet e menaxherëve të portofolit dhe administratorëve të Shoqërisë Administruese. Banka Depozitare gjithashtu kontrollon procesin e investimeve dhe të transaksioneve të investitorëve dhe është një element i rëndësishëm kontrolli.

j) Rreziku i Reputacionit

Rreziku i reputacionit është një dëmtim i emrit të mirë të Shoqërisë Administruese apo grupit ku ajo bën pjesë. Ky rrezik mund të vijë nga sjellja e Shoqërisë Administruese apo nga sjelljet e punonjësve të Shoqërisë Administruese.

Shoqëria Administruese ndjek parime të mirëqeverisjes të shprehura në rregulloren e brendshme të saj dhe ka ndërtuar rregulla për komunikimin dhe transparencën me klientët, të cilat garantojnë standarde të larta për mirëmbajtjen e reputacionit të Shoqërisë Administruese.

k) Rreziku i Personelit Kyç

Administratorët e Shoqërisë Administruese dhe menaxherët e portofolit janë kryesisht përgjegjës për performancën e Fondit dhe kjo performancë varet nga aftësitë profesionale të tyre, vendimmarrja e duhur dhe konsistenca e veprimeve të tyre. Gjithashtu ky staf i Shoqërisë Administruese mund të ndryshojë duke sjellë vështirësi në vijueshmërinë e aktivitetit.

6.4. Rreziqet që Ndikojnë te Investitorët dhe Shoqëria

l) Rreziku Ligjor

Rreziku ligjor shfaqet si pasojë e ndryshimeve në legjislacionin shqiptar në lidhje me Fondet e Investimit. Ndryshime të tilla mund të sjellin ndryshime në strategjinë e investimit, shpërndarjen strategjike dhe kushtet e tjera që mund të ndryshojnë pritshmëritë e investitorëve për Fondin.

m) Rreziku i Depozitarit

Funksioni i Bankës Depozitare është i një rëndësie të madhe. Kjo bankë licencohet nga Banka e Shqipërisë dhe nga AMF-ja për kryerjen e këtij funksioni. Për arsye të ndryshme operationale ajo mund të mos kryejë përlllogaritjen e vlerës së aseteve neto në kohë apo mund të sjellë vonesa në kryerjen e transaksioneve me letrat me vlerë.

n) Rreziku Politik

Kriza të theksuar politike mund të sjellin përkeqësim të aftësisë paguese të Shtetit Shqiptar dhe për rrjedhojë uljen e vlerës së obligacioneve të tyre.

o) Rreziku i Pezullimit të Shlyerjes së Kuotave

Investitori mund të kërkojë në çdo kohë shlyerjen e kuotave të tij. Shoqëria mund të pezullojë shlyerjen e kuotave në rrethana të jashtëzakonshme siç mund të jenë: a) ngjarjet politike, ekonomike, ushtarake, ngjarjet e politikës monetare ose sociale, etj., në ndikimin e të cilave vlerësimi, blerja apo shitja e aseteve të Fondit nuk është e mundur të kryhet siç do të kryhej në kushte normale; b) situatat e krizave financiare që çojnë në mbylljen e tregjeve financiare; c) ndërprerja apo prishja për arsye madhore e mjeteve të zakonshme të komunikimit; d) raste të tjera të gjykuara nga AMF-ja si të nevojshme për të mbrojtur interesat e mbajtësve të kuotave në një Fond apo Fonde të veçanta.

p) Rreziku i Vlerësimit të Aseteve

Investimet në asete jo-likuide vështirësojnë vlerësimin e këtyre asetëve duke mos pasur mundësi gjetjen e çmimit direkt për këto asete. Përdorimi i metodologjive për vlerësimin e asetëve jolikuide shoqërohet gjithmonë me vështirësinë nëse do të duhej kryerja e shitjeve të tyre pasi këto metodologji përmbajnë elemente subjektive që përafrojnë vlerën e drejtë të asetit.





q) Rreziku nga Delegimi i Funksioneve

Disa funksione të përmendura në seksionin 4 të këtij Prospekti që i delegohen palëve të treta janë të ekspozuara ndaj rreziqeve potenciale. Megjithatë Shoqëria Administruese mban përgjegjësi finale ligjore për funksionet e deleguara.

7. TË DREJTAT NGA KUOTAT E FONDIT

Nga momenti i zotërimit të kuotave nëpërmjet aktit të blerjes së tyre, investitori mund të kërkojë lëshimin e një certificate që vërteton pronësinë e tyre. Kjo certificate lëshohet me kërkesë të investitorit brenda 7 (shtatë) ditëve kalendarike nga kryerja e pagesës për blerjen e kuotave dhe përmban të dhëna mbi numrin e kuotave, çmimin e blerjes, të dhënat mbi Fondin dhe nënshkrimin e Shoqërisë Administruese.

Të drejtat që lidhen nga pronësia e kuotave në Fond janë:

-  E drejta e informacionit;
-  E drejta për shlyerjen e kuotave;
-  E drejta për të marrë pjesë në fitimin e Fondit në mënyrë proporcionale me pjesëmarrjen në të;
-  E drejta që asetet e Fondit, në rast falimenti të Shoqërisë Administruese të jenë objekt i së drejtës së ndarjes.

Fondi zotëron vetëm një klasë kuotash, të cilat zotërojnë kushtet e shprehura në këtë Prospekt. Të ardhurat nga asetet ri-investohen (kuota akumuluese).

Mbajtësit e kuotave nuk mbajnë përgjegjësi për veprimet apo mosveprimet e Shoqërisë Administruese apo Depozitarit.

Shoqëria Administruese mban regjistrin e kuotave të Fondit. Depozitari mban gjithashtu këtë regjistër dhe rikoncilon me Shoqërinë Administruese çdo veprim në këtë regjistër në përputhje me Ligjin Nr. 56/2020 dhe akteve nënligjore në zbatim të tij.

8. MËNYRA DHE KUSHTET E BLERJES APO SHLYERJES SË KUOTAVE

8.1. Blerja e Kuotave

Blerja e kuotave do të kryhet nëpërmjet: a) pagesës së asetëve monetare, ku blerësi hyn në një marrëdhënie kontraktuale me Shoqërinë Administruese në përputhje me kushtet dhe kriteret e

treguara në Prospekt, dhe b) këmbimit të kuotave të fondeve të tjera të investimit në të njëjtën monedhë, të menaxhuara nga e njëjta Shoqëri Administruese.

Blerja e kuotave nëpërmjet nënshkrimit të kontratës së blerjes do të bëhet pranë Shoqërisë Administruese me adresë Rr. Barrikadave, Albsig HQ, Kati 8, 1001, Tiranë, Shqipëri, rrjetit të Shoqërisë së Sigurimit Albsig sh.a dhe agjentëve që kanë lidhur kontratë me Shoqërinë Administruese për shërbimin e agjentit të Fondit të Investimit. Listën e rrjetit të agjentëve të Fondit së bashku me vendndodhjen e tyre e gjeni në adresën e publikuar në faqen zyrtare të Shoqërisë Administruese.

Nëse kërkesa për blerje mbërrin gjatë fundjavës ose në një ditë feste zyrtare, dita e kërkesës së vlefshme për shitje do të jetë dita e parë pasardhëse e punës.

Mbajtësit e kuotave janë përgjegjës për detyrimet e Fondit të Investimit deri në shumën e pjesëmarrjes së tyre në Fond.

Blerja e kuotave nëpërmjet një kontrate mund të kryhet si më poshtë:

1. Pagesë e menjëhershme, e cila nënkupton investimin e një shume të vetme;
2. Plan investimi, i cili nënkupton një investim periodik nëpërmjet pagesave të rregullta në vazhdimësi.

Shuma minimale e pagesës së menjëhershme është 10,000 (dhjetë mijë) lekë. Shuma minimale e planit të investimit është 1,000 (një mijë) lekë.

Çdo pagesë për blerje kuotash (e ndarë si proces nga procesi i blerjes së kuotave nëpërmjet kontratës së blerjes) kryhet në llogarinë bankare të Fondit me **IBAN: AL49 2061 1004 0000 1003 2129 9100**, të hapur pranë Bankës Depozitare, e cili është Banka Tirana sh.a., në një nga mënyrat e mëposhtme:

1. Pagesë cash direkt në llogarinë pranë Bankës Depozitare;
2. Transfertë nga llogaria e investitorit (pranë çdo banke tjetër të nivelit të dytë) drejt llogarisë së Fondit, kundrejt kushteve të punës.

Investitori do të nënshkruajë një kërkesë blerjeje dhe do të bëhet pronar i një numri të caktuar kuotash vetëm në momentin që kryen pagesën në favor të llogarisë së Fondit. Data e blerjes së kuotave dhe çmimi i blerjes së tyre është data kur pagesa (apo transfertat) për to ka mbërritur në llogarinë e Fondit pranë Bankës Depozitare.

Çmimi i blerjes së kuotës do të jetë çmimi i zbatueshëm në ditën e kryerjes së pagesës në Fond, i llogaritur në përputhje me Ligjin Nr. 56/2020 “Për Sipërmarrjet e Investimeve Kolektive”, rregulloret në zbatim të tij, si dhe në përputhje me këtë Prospekt.

Numri i kuotave në Fond përcaktohet me 4 (katër) shifra pas presjes dhjetore. Secili mbajtës i kuotave është bashkëpronar i aseteve të Fondit në përpjesëtim me numrin e kuotave që ai zotëron.

Shembull blerje kuote:

Gjatë ofertës fillestare të Fondit, çmimi i emetimit për kuotë është 1,000 lekë

Çmimi i kuotës në ditën e pagesës së shumës për investim	1,000 lekë
Shuma e investimit	5,000 lekë

Numri i kuotave të anëtarit në Fond (ALL 5,000 / ALL 1,000)	5 kuota
---	---------

Shuma e derdhur nga investitori do të investohet në asetet e shprehura te seksioni mbi politikën e investimit. Çmimi i kuotës reflekton rritjen e investimit nga norma e kthimit e aseteve në Fond.

Blerja e një kuote pas muajit fillestar:

Çmimi i kuotës në ditën e pagesës së shumës për investim	1,200 lekë
Shuma e investimit	5,000 lekë
Numri i kuotave të anëtarit në Fond (ALL 5,000 / ALL 1,200)	4.1667 kuota

Numri total i kuotave në pronësi të anëtarit do të jetë: 5 kuota nga blerja e parë + 4.1667 kuota të blera nga blerja e dytë = 9.1667 kuota. Në datën e blerjes së dytë kur çmimi i kuotës është 1,200 lekë, balanca e klientit në lekë është e barabartë me 9.1667 kuota shumëzuar me çmimin 1,200 lekë ose 11,000.04 lekë.

Nëse në një datë të mëvonshme çmimi i kuotës do të shkojë në 1,500 lekë, dhe investitori nuk ka kryer më investime, balanca e tij në Fond do të jetë: 9.1667 kuota shumëzuar me çmimin, 1,500 lekë e barabartë me 13,750.05 lekë.

8.2. Shlyerja e Kuotave

Investitorët apo mbajtësit e kuotave kanë të drejtë që të kërkojnë në çdo kohë shlyerjen e kuotave. Investitori duke u paraqitur pranë selisë së Shoqërisë Administruese në adresën Rruga e “Barrikadave”, Albsig HQ, Kati 8, Tiranë, Shqipëri apo pranë agjentëve që kanë lidhur një kontratë për kryerjen e shërbimit të shitjes (adresa e tyre ndodhet në faqen e internetit të Shoqërisë Administruese) duhet të nënshkruajë një kërkesë për shitjen e kuotave. Në këtë kërkesë për shitje apo shlyerje të kuotave, investitori duhet të vendosë dhe numrin e llogarisë të një banke të nivelit të dytë pasi asetet monetare do të kalojnë nga llogaria e Fondit pranë Bankës Depozitare drejt llogarisë së investitorit.

Nëse kërkesa për shlyerjen e kuotave mbërrin gjatë fundjavës ose në një ditë feste zyrtare, dita e kërkesës së vlefshme për shitje do të jetë dita e parë pasardhëse e punës.

Shoqëria Administruese duhet të respektojë kërkesën e investitorëve për shlyerjen e kuotave jo më gjatë se 7 (shtatë) ditë kalendarike nga data e regjistrimit të kërkesës për tërheqje. Çmimi i zbatueshëm për tërheqje është ai i datës së regjistrimit të kërkesës.

Çdo pagesë bëhet në mjete monetare, përjashtuar rasteve të veçanta, kur instrumentet financiare të Fondit janë të tregtuara në tregje të organizuara ose të rregulluara, kur është i mundur të përcaktohet çmimi i tyre i saktë, dhe vetëm në këtë rast pagesa mund të kryhet në instrumente financiare. Në rrethana të veçanta, kur shitja e aseteve të Fondit, e nevojshme për të plotësuar kërkesat për shlyerjen në vlera të mëdha, mund të komprometojë pozicionin e investitorëve të përhershëm në Fond, shlyerja e kuotave mund të bëhet duke përdorur instrumentet financiare të Fondit. Shlyerja me instrumente financiare mund të bëhet vetëm duke transferuar atë pjesë të çdo lloji aseti të Fondit, e cila është në përpjesëtim me numrin e kuotave të investitorëve, që kërkojnë shlyerjen dhe vlerën totale të të Fondit.

Numri i kuotave në Fond përcaktohet me 4 (katër) shifra pas presjes dhjetore.

Asnjë kuotë nuk mund të shitet apo të shlyhet me çmim tjetër përveç çmimit të ardhshëm të llogaritur pas marrjes së urdhrin për blerjen ose shitjen e kuotave.

9. PEZULLIMI I SHITJES DHE SHLYERJES SË KUOTAVE TË FONDIT

Shlyerja dhe shitja e kuotave të Fondit mund të pezullohet në rastet kur:

1. Shoqëria Administruese dhe Depozitari vlerësojnë se rrethanat janë të jashtëzakonshme dhe se ka arsye të forta e të justifikuar, për pezullimin e shlyerjes dhe shitjes, në interes të mbajtësve ekzistues të kuotave ose të mbajtësve potencialë.
2. Nëse Shoqëria Administruese merr vendim për pezullimin e shitjes dhe shlyerjes së kuotave dhe nëse Depozitari nuk është dakord me një vendim të tillë, ky i fundit njofton menjëherë AMF-në.
3. Shoqëria Administruese, në çdo rast, i njofton menjëherë AMF-së vendimin për pezullim të shitjes dhe shlyerjes së kuotave. AMF-ja, pas marrjes së njoftimit nga Shoqëria Administruese për pezullimin e shitjes dhe shlyerjes së kuotave, mund të urdhërojë anulimin e këtij vendimi, nëse gjykon se është në interes të publikut ose në interes të investitorëve në Fond. Shoqëria Administruese publikon menjëherë të dhënat për çdo pezullim të shitjes dhe shlyerjes së kuotave, në faqen e saj zyrtare të internetit, gjatë gjithë kohëzgjatjes së pezullimit, si dhe në një gazetë të përditshme, me qarkullim në të gjithë territorin e Republikës së Shqipërisë.
4. Shlyerja dhe shitja e kuotave në një Fond Investimi mund të pezullohet edhe nga AMF-ja, e cila mund të urdhërojë Shoqërinë Administruese dhe Depozitarin të pezullojë përkohësisht shlyerjen dhe shitjen e kuotave nëse ekzistojnë shkaqe të forta dhe të justifikuar për këtë pezullim dhe nëse kjo është në interes të mbajtësve ekzistues të kuotave ose të mbajtësve potencialë.
5. Pezullimi i shlyerjes së kuotave duhet të mbarojë sa më shpejt që të jetë e mundur, ose menjëherë sapo arsyet për pezullimin e shitjes dhe shlyerjes nuk ekzistojnë më dhe jo më vonë se 20 (njëzet) ditë pune nga fillimi i pezullimit, përveçse nëse AMF-ja jep miratimin me shkrim për zgjatjen e kufirit të dhënë kohor. Rifillimi i veprimtarisë tregtare në një Fond Investimi i njoftohet pa vonesë AMF-së, dhe publikohet në faqen zyrtare të internetit të Shoqërisë Administruese, si dhe publikohet në një gazetë të përditshme, në qarkullim në të gjithë territorin e Republikës së Shqipërisë.

Gjatë pezullimit të shlyerjes dhe shitjes së kuotave, Shoqëria Administruese dhe agjentët e saj të shitjes mund të vazhdojnë të marrin kërkesa për shitjen ose shlyerjen e kuotave, që do të ekzekutohen menjëherë pasi të jenë llogaritur çmimet e tjera të shlyerjes dhe shitjes, por palëve porositëse u bëhet e qartë se porositë e tyre nuk do të përmbushen brenda kufijve kohorë, të përshkruar në Prospektin dhe rregullat e Fondit.

Nëse në një ditë tregtimi bëhen kërkesa për shlyerje të kuotave, për më shumë se 10% të vlerës së aseteve neto të Fondit, atëherë shlyerja e shumës së vlerës përtej këtij kufiri do të shtyhet në pikën e ardhshme të investimit. Shoqëria Administruese garanton trajtim të njëjlojtë të të gjithë mbajtësve të kuotave që kanë depozituar kërkesat për shlyerje të kuotave në ditën që kufiri prej 10% të vlerës të aseteve neto të Fondit është kaluar.

10. KËMBIMI I KUOTAVE

Mbajtësit e kuotave apo investitorët në Fond mund t'i këmbajnë ato me kuota të një Fondi tjetër Investimi, të menaxhuara nga e njëjta Shoqëri Administruese në të njëjtën monedhë.

Investitori që dëshiron të këmbjë kuota do të nënshkruajë një kërkesë për këmbim kuotash. Për këmbimin e kuotave, numri i kuotave të reja të blera do të përcaktohet duke iu referuar çmimeve përkatëse të kuotave të reja dhe kuotave të vjetra në datën e vlerësimit kur do të ndodhë. Këmbimi nuk do të kryhet gjatë periudhës kur e drejta për shlyerje është pezulluar. Këmbimi i kuotave midis dy Fondeve të Investimit do të kryhet vetëm në një ditë pune kur të dy Fondet kanë mundur të nxjerrin çmimet përkatëse të kuotave. Efekti fiskal i këmbimit të kuotave është i njëjtë si në rastin e shitjes apo shlyerjes së tyre nga investitori.

11. TRANSFERIMI I KUOTAVE TË FONDIT

Çdo investitor ka të drejtë t'i transferojë kuotat që zotëron nëpërmjet një akti transferimi të miratuar nga Shoqëria Administruese. Shoqëria Administruese nuk kryen kalimin në fjalë nëse është e ndaluar nga Ligji.

Çdo urdhër transferimi nënshkruhet nga ose në emër të mbajtësit të kuotave që transferon kuotat ose në rastin e subjektit juridik, duhet të mbajë vulën e këtij subjekti ose të nënshkruhet nga një ose më shumë nënpunës të subjektit që kanë autorizimin përkatës për nënshkrimin dhe transferuesi trajtohet si pjesëmarrës deri në momentin kur emri i marrësit të jetë regjistruar në regjistër. Transferimi i kuotave është subjekt tatimi sipas legjislacionit në fuqi.

Shoqëria Administruese nuk do të aplikojë tarifë transferimi.

Çdo urdhër transferimi do të shoqërohet me dokumentin e nevojshëm përkatës.

12. HUMBJA E JETËS SË ANËTARIT

Nëse investitori humb jetën përpara marrjes së të gjitha asetëve të veta në Fond, asetet në llogarinë e tij do t'i shpërndahen trashëgimtarëve në përputhje me dispozitat ligjore që rregullojnë trashëgiminë.

13. BASHKIMI DHE MBYLLJA E FONDIT

13.1. Bashkimi i Fondit me një Fond Tjetër

Fondi i investimit Albsig Standard mund të bashkohet vetëm me një Fond Investimesh me ofertë publike. Fondi i Investimit Albsig Standard mund të jetë një Fond që bashkohet ose një Fond marrës. Një marrëveshje bashkimi lidhet mes Këshillave të Administrimit të Shoqërive Administruese të

Fondeve që bashkohen. Autoriteti miraton paraprakisht çdo bashkim të Fondeve të Investimit me ofertë publike. Mbjajtësit e kuotave në Fondet që bashkohen përfitojnë një vlerë të barasvleshme kuotash në fondin pjesëmarrës në bashkim në datën e bashkimit. Për të arritur këtë, nëse është e nevojshme, mbajtësve të kuotave mund t'u ofrohen pagesa të vogla kompensuese në para.

Të gjitha të drejtat dhe detyrimet e Fondit që bashkohet, i kalohen një Fondi ekzistues (ose të krijuar rishtazi) marrës. Mbjajtësit e kuotave në Fondet pjesëmarrëse në bashkim marrin kuotat në Fondin marrës dhe Fondet pjesëmarrëse në bashkim prishen.

Mbjajtësit e kuotave të Fondeve bashkuese dhe marrëse kanë të drejtë t'i shlyejnë kuotat e tyre pa pagesë ose t'i këmbajnë kuotat e Fondit që do të bashkohet me kuota të një Fondi tjetër me natyrë të ngjashme investimi, e cila administrohet nga e njëjta Shoqëri Administruese. E drejta e shlyerjes dhe këmbimit të kuotave është e vlefshme deri në 5 (pesë) ditë punë, përpara datës së hyrjes në fuqi të bashkimit.

Rrethanat e mbylljes dhe të likuidimit:

Shoqëria Administruese mund të iniciojë mbylljen e Fondit, kur krijohen rrethanat e parashikuara në ligjin nr. 56/2020 "Për Sipërmarrjet e Investimeve Kolektive" dhe në mënyrë të veçantë kur:

1. Ajo mbyll vullnetarisht aktivitetin e saj;
2. I nënshtrohet procedurave të falimentit dhe likuidimit si pasojë e mospërbushjes së detyrimeve;
3. AMF-ja i ka hequr përkohësisht ose në mënyrë të përhershme licencën;
4. Fondi nuk është ekonomikisht i qëndrueshëm;
5. Depozitari dhe Shoqëria Administruese nuk përmbushin detyrat e tyre dhe nuk zëvendësohen brenda 60 (gjashtëdhjetë) ditëve pune;
6. Në përfundim të bashkimit me një Fond tjetër marrës.

Fondi i Investimit me ofertë publike likuidohet në momentin e heqjes së licencës nga autoriteti.

13.2. Kërkesa për Likuidim Vullnetar dhe Procedura e Likuidimit

Kërkesa për likuidim vullnetar i paraqitet AMF-së nga Shoqëria Administruese jo me pak se 3 (tre) muaj, përpara datës së propozuar të likuidimit. Shoqëria Administruese deklaron arsyet e kërkesës dhe paraqet planin kohor për likuidimin.

Pas dhënies së miratimit nga AMF-ja, mbajtësit e kuotave informohen lidhur me likuidimin. Ky informacion përmban:

- a) arsyet e likuidimit;
- b) pasojat e mundshme për mbajtësit e kuotave;
- c) kostot përkatëse;
- d) pasqyrat e aftësisë pagueuse;
- e) datën e planifikuar të përfundimit të likuidimit vullnetar dhe datën kur mbajtësit e kuotave do të marrin pagesën në vlerë monetare të kuotave.

13.3. Procedura e Mbylljes nga Transferimi i Fondit

Kur Fondi i Investimit mbyllet si pasojë e transferimit të të gjithë aktivitetit të një Fond marrës si pasojë e bashkimit, zbatohen procedurat e mëposhtme:

- a) njoftimi për mbylljen i dërgohet menjëherë mbajtësve të kuotave;
- b) ndërpritet vlerësimi dhe përcaktimi i çmimit për kuotat;
- c) Fondi nuk emeton më kuota;
- d) nuk mund të kryhet asnjë ndryshim në regjistrin e kuotave;
- e) Fondi i Investimit nuk ushtron asnjë veprimtari me përjashtim të veprimtarisë së mbylljes;
- f) detyrimet dhe përgjegjësitë e Shoqërisë Administruese vijnë të zbatohen deri në përfundim të mbylljes.

14. PËRLOGARITJET DHE FREKUENCA E VLERËSIMIT TË ASETVE, VLERËS NETO TË ASETVE DHE ÇMIMIT

Metoda e vlerësimit të asetve dhe detyrimeve të Fondit bazohet në Ligjin nr. 56/2020, “Për Sipërmarrjet e Investimeve Kolektive”, rregulloren e miratuar nga AMF-ja dhe parimet e Standardeve Ndërkombëtare të Raportimit Financiar (SNRF).

Vlera e tregut e bonove dhe obligacioneve të Shtetit Shqiptar do të llogaritet duke përdorur vlerën e drejtë. Në kushtet e një tregu jo-aktiv të letrave me vlerë, rivlerësimi bëhet duke u mbështetur në *yield*-in deri në maturim, i cili llogaritet me metodën e interpolimit linear sipas *yield*-eve më të fundit të ankandeve të bonove të thesarit apo obligacioneve dhe ditëve të mbetura deri në maturim të letrës me vlerë.

Vlera neto e Fondit është vlera e asetve minus detyrimet e tij. Ndër detyrimet kryesore renditet tarifa e administrimit të Shoqërisë Administruese. Vlera neto për kuota apo çmimi i një kuote llogaritet duke pjesëtuar vlerën neto të asetve të Fondit me numrin e kuotave të Fondit.

Vlera neto e asetve të Fondit dhe çmimi i një kuote do të llogariten çdo ditë deri në orën 16:00 të asaj dite. Depozitari kuadron me Shoqërinë Administruese vlerën neto të asetve. Dita e vlerësimit të asetve të Fondit (t-1) do të jetë një ditë para ditës (t) gjatë së cilës është llogaritur vlera neto e asetve për kuota.

15. PUBLIKIMI I TË DHËNAVE DHE INFORMIMI I INVESTITORËVE

Shoqëria Administruese do të publikojë vlerën (çmimin) e kuotës në Fond dhe Vlerën Neto të Asetve (VNA), çdo ditë në faqen e saj të internetit www.albsiginvest.al. Çdo anëtar në Fond do të ketë akses në faqen zyrtare të Shoqërisë Administruese, përmes një “përdoruesi” dhe “fjalëkalimi”, me të cilët kontrollon llogarinë në Fond.

Ndryshimet thelbësore të Prospektit i komunikohen mbajtësve të kuotave drejtpërdrejt, me postë normale ose postë elektronike dhe publikohen në faqen e internetit të Shoqërisë Administruese, www.albsiginvest.al gjatë 60 (gjashtëdhjetë) ditëve pune përpara ditës së implementimit të ndryshimeve. Mbajtësit e kuotave kanë të drejtë të kërkojnë nga Fondi shlyerjen e kuotave pa zbritur asnjë komision daljeje të aplikueshëm nëse ndryshimet thelbësore bien ndesh me pritshmëritë e tyre. Shlyerja e kuotave kryhet para implementimit të ndryshimeve në Prospekt.

Shoqëria Administruese është e detyruar në mënyrë periodike të raportojë pranë AMF-së raporte mbi aktivitetin e saj sipas afateve të përcaktuara në Ligj.

Të gjitha raportet gjashtë mujore dhe vjetore të Shoqërisë Administruese si dhe raportet e Fondit, Prospektit, rregullat e Fondit dhe çdo informacion shtesë do të vihen në dispozicion të investitorit pranë zyrave qendrore të Shoqërisë Administruese tek Rruga e Barrikadave, Albsig HQ, Kati 8, Tiranë, Shqipëri, pas një kërkesë me shkrim apo nëpërmjet postës elektronike.

Prospekti i Fondit do të jetë i disponueshëm në selinë e çdo agjenti të Shoqërisë (adresa e agjentëve ndodhet në faqen e internetit të shoqërisë në seksionit Shërbime/Rrjeti i Agjentëve).

Investitorët duhet të njoftojnë Shoqërinë Administruese nëpërmjet postës elektronike për çdo ndryshim të të dhënave të tyre të kontaktit dhe të dhënave personale si: adresa, nr. tel., mbiemri (duke vendosur ID-në e re), shtetësia etj.

16. TRAJTIMI FISKAL I FONDIT DHE INVESTITORIT

Fondi për qëllime tatimi konsiderohet si pronar i titujve ose i të gjitha aseteve. Trajtimi tatimor i Fondit bazohet në Ligjin nr. 8438, datë 28.12.1998 “Për Tatimin mbi të Ardhurat”, i ndryshuar, si dhe aktet nënligjore në zbatim të tij.

Të ardhurat që rezultojnë nga diferenca ndërmjet çmimit të shitjes dhe çmimit të blerjes së kuotave në Fond, do të taten, sipas Ligjit nr. 8438, datë 28.12.1998 “Për Tatimin mbi të Ardhurat” i ndryshuar, si dhe aktet nënligjore në zbatim të tij. Zbritja mbahet në burim nga fitimet kapitale nga investimi.

Trajtimi tatimor pasqyron trajtimin aktual të Fondeve të Investimit. Megjithatë si rezultat i ndryshimeve ligjore apo akteve nënligjore në të ardhmen, vlerësimi fiskal i investitorit mund të ndryshojë.

17. TARIFAT E SHOQËRISË ADMINISTRUESE

17.1. Tarifa e Hyrjes dhe e Largimit:

Fondi NUK do t’i ngarkojë investitorit tarifë hyrëse në momentin e blerjes së kuotave apo tarifë largimi kur investitori shet kuotat e Fondit.

17.2. Tarifa Vjetore e Administrimit:

Tarifa e administrimit të Fondit do të mbahet nga vlera neto e aseteve të Fondit. Ajo do të jetë deri në 1% (një përqind) në vit e vlerës neto të aseteve të Fondit.

Tarifa e administrimit do të llogaritet dhe do të mbahet në fund të çdo ditë nga vlera neto e asetëve të Fondit. Ajo do t'i paguhet Shoqërisë Administruese një herë në muaj si shumë e të gjitha vlerave ditore të muajit përkatës.

Formula e llogaritjes ditore të tarifës së administrimit është: Tarifa vjetore e raportuar e administrimit X 1/365.

17.3. Tarifa të Tjera:

Fondi do t'i ngarkojë mbajtësit e kuotave me kosto të tjera si më poshtë:

- Tarifa që i paguhet Bankës Depozitare

Kjo tarifë do të llogaritet dhe do të mbahet në fund të çdo dite nga vlera neto e asetëve të Fondit. Ajo do t'i paguhet Bankës Depozitare një herë në muaj si shumë e të gjitha vlerave ditore të muajit përkatës. Kjo kosto shprehet si përqindje mbi vlerën e asetëve neto të Fondit.

- Kostot e auditimit vjetor të Fondit

Kjo kosto do të llogaritet dhe do të mbahet në fund të çdo dite nga vlera neto e asetëve të Fondit. Ajo do t'i paguhet audituesit të jashtëm një herë në vit si shumë e të gjitha vlerave ditore të vitit përkatës. Kjo kosto shprehet si vlerë nominale.

- Tarifat dhe kostot që i paguhen AMF-së për Fondin

Kjo kosto do të llogaritet nga vlera e përgjithshme e asetëve të Fondit dhe do të mbahet në fund të çdo muaji nga vlera neto e asetëve të Fondit. Ajo do t'i paguhet AMF-së një herë në muaj. Kjo kosto shprehet si përqindje ndaj vlerës së përgjithshme të asetëve.

- Kostot dhe komisione për shit-blerje të asetëve të Fondit

Kostot e komisioneve për tregtimin e letrave me vlerë shprehen në vlerë nominale dhe mbahen nga vlera e asetëve neto të Fondit kur Fondi kryen transaksione shit-blerje me letrat me vlerë. Ajo paguhet në ditën e kryerjes së transaksionit.

- Kostot dhe komisione të tjera

Investitori mund të jetë subjekt i komisioneve të ndryshme bankare para se pagesa e tij të arrijë në llogarinë e Fondit, si komisione për përpunimin e Fondeve cash nëse pagesa do të kryhet në cash ose komisioneve për transferimin e Fondeve drejt Bankës Depozitare nga një bankë e nivelit të dytë kur kryen investimin, apo edhe të jetë subjekt i komisioneve të transfertave nga Banka Depozitare në një bankë të nivelit të dytë kur kërkon shlyerjen e kuotave. Nëse transfertat kryhet brenda llogarive të Bankës Depozitare (kur klienti ka llogari në Bankën Depozitare) klienti nuk ngarkohet me komisione transfertat.

Tarifa e administrimit dhe kostot e tjera të listuara më sipër, në një vit financiar nuk do të tejkalojnë maksimumin prej 1.5% (një pikë pesë përqind) të vlerës neto të asetëve të Fondit. Shoqëria nuk do të ngarkojë asnjë tarifë tjetër përveç atyre të listuara në pikën 17.2 dhe 17.3.

Shoqëria Administruese mund të ndryshojë tarifat e Fondit në përputhje me Ligjin nr. 56/2020 "Për Sipërmarrjet e Investimeve Kolektive" dhe rregulloreve të dala në zbatim të tij. Çdo ndryshim tarifash do të reflektohet në ndryshime në Prospektin e Fondit, i cili miratohet paraprakisht nga AMF-ja dhe i njoftohet mbajtësve të kuotave menjëherë.

18. DEPOZITARI

Shoqëria Administruese ka lidhur një marrëveshje për shërbimin e Depozitarit për Fondin e Investimit me Bankën Tirana sh.a regjistruar si person juridik shqiptar me vendimin Nr.12718, datë 03.11.1995 të Gjykatës së Rrethit Gjyqësor Tiranë, NIPT: J61924008V, me seli në Tiranë në adresën Rr. “Ibrahim Rugova”, që vepron si bankë me Licencën nr.07, datë 12.09.1996 të lëshuar nga Banka e Shqipërisë.

Gjithashtu në bazë të vendimit Nr. 23, datë 24.03.2010 të Këshillit Mbikëqyrës së Bankës së Shqipërisë, është licencuar për të ofruar shërbime kujdestarie, depozitimi dhe të besimit si dhe është miratuar nga Autoriteti i Mbikëqyrjes Financiare për të ofruar shërbime depozitimi për Fondin e Investimit me vendimin Nr. 2 datë 06.06.2019 (pa afat).

Asetet e Fondit ruhen dhe mbahen nga Depozitari në një llogari të posaçme dhe nuk mund të përdoren për kryerjen e transaksioneve për llogari të Depozitarit, apo për qëllime të tjera përveç atyre të shprehura në këtë Prospekt. Asetet e Fondit nuk përfshihen në asetet e Depozitarit, në procedurat e likuidimit ose falimentimit të nisura sipas legjislacionit shqiptar dhe as për zbatimin e pretendimeve ndaj Depozitarit.

Depozitari njofton menjëherë Autoritetin nëse ka arsye se Shoqëria Administruese ka shkelur ligjin ose Prospektin dhe rregullat e Fondit.

1. Garantoni, që shitja, emetimi, riblerja, shlyerja dhe anulimi i kuotave të realizuara për llogari të Fondit të Investimit të Shoqërisë Administruese, janë kryer në përputhje me ligjin dhe rregullat e Fondit;
2. Riblen, shlyen kuotat dhe bën pagesa në favor të mbajtësve të kuotave në Fondin e Investimit nga asetet e Fondit;
3. Garantoni që llogaritja e vlerës neto të aseteve të aksioneve ose të kuotave në Fond është shpallur në përputhje me ligjin, rregulloret përkatëse të AMF-së, Prospektin dhe rregullat e Fondit;
4. Zbatoni urdhërat e Shoqërisë Administruese për transaksionet, që përfshijnë titujt dhe asetet e tjera që përbëjnë portofolin, me kusht që ato të mos jenë në kundërshtim me këtë ligj, me rregulloret e AMF-së, Prospektin dhe/ose rregullat e Fondit dhe bën të mundur realizimin dhe kryerjen e transaksioneve me titujt, që do të thotë se detyrimet monetare janë arkëtuar brenda kufijve kohorë, ligjorë ose kufijve kohorë të miratuar nga palët;
5. I raportoni Shoqërisë Administruese për veprimet e shoqërisë për asetet e Fondit, të cilat i ruan në formë të shkruar ose elektronike dhe, në vijim, zbatoni urdhrat e saj;
6. Arkëtoni të ardhurat dhe përfitimet e tjera përkatëse në dobi të Fondit dhe që u bashkëngjiten aseteve të tij;
7. Siguroni se fitimi i Fondit përdoret në përputhje me këtë ligj, me Prospektin dhe/ose rregullat e Fondit dhe se të gjitha kostot e paguara nga Fondi janë në përputhje me kushtet e përcaktuara në Prospekt dhe/ose rregullat e Fondit;
8. Kryeni veprimtari të tjera profesionale ose administrative, sipas parashikimeve në kontratën ndërmjet tij dhe Shoqërisë Administruese ose Këshillit të Administrimit;
9. Mban, për çdo Fond të veçantë, evidenca dhe regjistrime për kryerjen e veprimtarisë si depozitar dhe i rakordon këto të dhëna me të dhënat e evidencave dhe të regjistrimeve të Shoqërisë Administruese;
10. I raportoni AMF-së për çdo shkelje të këtij ligji dhe të kontratës nga Shoqëria Administruese, në rast se kjo shoqëri refuzon të pranojë kërkesën e tij për ndërprerjen e kësaj shkeljeje; U siguroni

- akses në të dhënat dhe llogaritë kontabël, që lidhen me Fondin dhe asetet e tij, ekspertëve kontabël të autorizuar dhe personave të tjerë të autorizuar për kontroll, përfshirë dhe AMF-në;
11. Me kërkesë të AMF-së, siguron çdo lloj informacioni për asetet, që mban për një Sipërmarrje Kolektive Investimi, përfshirë, por pa u kufizuar, të dhëna që provojnë ekzistencën e aseteve.

Depozitari nuk kryen asnjë veprimtari lidhur me Fondin, të cilat mund të shkaktojnë konflikt interesi, me përjashtim të rastit kur Depozitari ka bërë një ndarje funksionale të kryerjeve të këtyre detyrave nga detyrat e tjera të Depozitarit, dhe nëse konflikti i mundshëm i interesit identifikohet, administrohet në mënyrë të përshtatshme.

Depozitari nuk zotëron licencën si Shoqëri Administruese.

Depozitari zbaton politika dhe procedura për të administruar konfliktin e interesit me persona apo subjekte të lidhur të cilat garantojnë: a) identifikimin e konfliktit të interesit, b) ndërmarrjen e masave për të shmangur këto konflikte interesi.

Shoqëria Administruese dhe Depozitari raportojnë dhe monitorojnë konflikte interesi, të cilat nuk mund të shmangen.

19. EMRI DHE SELIA E AUDITUESIT TË JASHTËM

Audituesi i jashtëm i Shoqërisë Administruese dhe i Fondeve nën administrim është: RSM Albania AL sh.p.k, i regjistruar me vendim nr. 757, datë 16.09.2021, në Regjistrin Publik të IEKA.

Me seli në adresën: Rruga " Elbasanit", Pallati Edil Al-It, pranë Ambasadës Amerikane P.O.B. 1437, Tiranë, Shqipëri
NIPT: L92313035V

Tel: +355 4 23446 077

Audituesi i Jashtëm miratohet nga Autoriteti i Mbikëqyrjes Financiare.

Auditues Ligjor të shoqërisë audituese janë:

1. Bujar Bendo;
2. Fatbardha Shtrepi;
3. Fatian Devija;
4. Elona Bisha.

Audituesi i Jashtëm miratohet nga Autoriteti i Mbikëqyrjes Financiare.

20. VITI FINANCIAR

Viti financiar i Fondit do të jetë viti kalendarik 1 Janar - 31 Dhjetor.

21. INFORMACIONI PLOTËSUES

Secili investitor potencial duhet të verifikojë pranë zyrave qendrore të Albsig Invest sh.a, Rruga e Barrikadave, Albsig HQ, Kati 8, 1001, Tiranë, Shqipëri dhe pranë çdo agjenti, nëse ky Prospekt është versioni më i fundit dhe se nuk po kryhen ndryshime apo rishikime të tjera që nga momenti që ky Prospekt ka dalë në qarkullim.

21.1. Etika dhe Konflikti i Interesit

Shoqëria Administruese ka ndërtuar Kodin e Etikës duke përdorur standardet e mirëqeverisjes dhe praktikave më të mira. Ky Kod adreson në mënyrë të drejtpërdrejtë konfliktin e interesit, i cili ndalon punonjësit e Shoqërisë Administruese të kenë paralelisht një aktivitet apo biznes personal që bie ndesh apo kufizon ato në marrjen e vendimeve të duhura për Fondin.

Fondi do të menaxhohet me profesionalizëm dhe integritet. Shoqëria Administruese preferon që Menaxherët e Portofolit të kenë certifikatën e njohur CFA (*Chartered Financial Analyst*), të cilët edukohen me standardet më të lartë të profesionalizmit dhe të etikës në industrinë financiare. Drejtori i Investimeve të Shoqërisë Administruese zotëron certifikatën CFA. Një nga standardet kryesore është se Menaxheri i Portofolit duhet të tregohet i arsyeshëm, i matur dhe i mençur gjatë aktivitetit të investimit të Fondit.

21.2. Statusi FATCA

Për të qenë në përputhje me legjislacionin fiskal të kërkuar nga SHBA, Fondi do të regjistrohet në Agjencinë Amerikane të të Ardhurave (*IRS: US Internal Revenue Service*), konkretisht në FATCA (*Foreign Account Tax Compliance Act*). Bazuar në kërkesën e investitorëve, Shoqëria Administruese do të njoftojë këta të fundit për numrin unik (GIIN) për qëllime raportimi në FATCA.

21.3. Ankesat

Për çdo ankesë ju lutem dërgojeni me shkrim në adresën e Shoqërisë Administruese, tek Rruga e Barrikadave, Albsig HQ, Kati 8, 1001, Tiranë, Shqipëri.

Të gjitha ankesat do të shqyrtohen dhe do t'u jepet përgjigje brenda 2 javëve nga data e pranimit të tyre.

21.4. Shkëmbimi Automatik i Informacionit të Llogarive Financiare

Të gjithë investitorëve që duan të hapin një llogari të re, do ju kërkohet të plotësojnë një formë Vetëdeklarimi me të dhënat e tyre personale dhe tatimore në zbatim të Ligjit nr. 4 datë 30.01.2020 "Për Shkëmbimin Automatik të Informacionit të Llogarive Financiare". Sipas këtij ligji, institucioneve financiare si Albsig Invest sh.a u kërkohet të raportojnë llogaritë financiare të klientëve, të cilët janë rezidentë për qëllime tatimore në një juridiksion pjesëmarrës në Standardin e Përbashkët të Raportimit të vendosur nga OECD.

21.5. Ekzekutimi Optimal i Transaksioneve në Tregun e Kapitaleve

Shoqëria Administruese zbaton parimin e kërkimit të aplikimit të kostove minimale për ekzekutimin e transaksioneve në tregun e kapitalit të shtjelluar në një politikë të posaçme mbi ekzekutimin e transaksioneve.

Pasi Shoqëria ka përcaktuar llojin e letrës me vlerë në përputhje me politikën e investimit që duhet tregtuar për një Fond të caktuar ajo zbaton disa kritere bazë për përzgjedhjen e ofertave më të mira. Kriteret e përzgjedhjes së transaksionit më optimal janë:

1. Çmimi i letrës me vlerë;
2. Kostot eksplicite;
3. Kostot implicite;
4. Kostot oportune të mosekzekutimit në kohë të një transaksioni.

Ekzekutimi i urdhrat realizohet për ato oferta që përbëjnë kombinimin më optimal të kritereve të lartpërmendura.

Përzgjedhja e ndërmjetësve tregtar, të cilëve ju përcillen urdhrat, kryhet në varësi të: a) reputacionit të ndërmjetësit; b) mbulimit të sektorëve të tregut të kapitalit që këto ndërmjetës janë të specializuar; c) volumet e tregtuara; d) shpejtësia e ekzekutimit; dhe e) platformat e përdorura.

Tregu i letrave me vlerë të emetuara nga Republika e Shqipërisë përbëhet nga tregu primar dhe tregu sekondar. Në tregun sekondar transaksionet kryhen me ndërmjetës financiar të licencuar sipas ligjeve dhe rregulloreve përkatëse. Tregu i këtyre letrave është treg i rregulluar nga organet rregullatore si Banka e Shqipërisë dhe Autoriteti i Mbikëqyrjes Financiare.

ANEKSI 1: RREGULLAT E “FONDIT TË INVESTIMIT ALBSIG STANDARD”

Neni 1

Objekti i Rregullave të Fondit

1. Rregullat e Fondit rregullojnë kushtet e veprimtarisë së Fondit të Investimit ALBSIG STANDARD (në vijim referuar si “Fondi”, një sipërmarrje investimesh kolektive me oferte publike të veçantë dhe me pjesëmarrje të hapur, i themeluar nga Albsig Invest - Shoqëri Administruese e Fondeve të Pensionit dhe Sipërmarrjeve të Investimeve Kolektive, si dhe marrëdhëniet ligjore ndërmjet Albsig Invest sh.a (në vijim “Shoqëria Administruese”) si dhe mbajtësve të kuotave në Fond (në vijim referuar si “Investitorët”).
2. Rregullat e Fondit nuk përmbajnë detyrimisht të gjithë informacionin dhe të dhënat e paraqitura në Prospekt. Investitorët këshillohen të studiojnë të gjithë përmbajtjen e Prospektit.

Neni 2

Struktura Juridike e Fondit

1. Fondi Albsig Standard është një sipërmarrje investimesh kolektive me ofertë publike, e veçantë dhe me pjesëmarrje të hapur.
2. Fondi nuk ka personaliteti juridik. Shoqëria Administruese Albsig Invest sh.a është subjekti juridik që administron Fondin Albsig Standard dhe e përfaqëson atë ndaj palëve të treta.

Neni 3

Shoqëria Administruese

1. Shoqëria Administruese e Fondit është Albsig Invest.
2. Albsig Invest sh.a është një shoqëri aksionare, e krijuar në përputhje me ligjin “Për Shoqëritë Tregtare”, e regjistruar në Qendrën Kombëtare të Biznesit në regjistrin tregtar me NIPT: L92208025J, e licencuar nga Autoriteti i Mbikëqyrjes Financiare (në vijim AMF) për të vepruar si Shoqëri Administruese e Fondeve të Pensionit Vullnetar në mbledhjen dhe investimin e Fondeve të Pensionit Vullnetar dhe kryerjen e pagesave të pensionit, si dhe për administrimin e Aseteve të Sipërmarrjeve të Investimeve Kolektive, me seli në adresën: Rruga e Barrikadave, Albsig HQ, Kati 8, Tiranë, Shqipëri.
3. Aksionari i vetëm i Shoqërisë Administruese është Shoqëria e Sigurimit “Albsig Jetë” sh.a, i cili zotëron 100% të aksioneve. “Fondi i Investimit Albsig Standard” nuk mbështetet apo garantohet në çfarëdo formë nga Shoqëria e Sigurimit “Albsig Jetë” sh.a, dhe rreziku i investimit i përket tërësisht investitorit.
4. Kapitali i regjistruar i Shoqërisë është 69,000,000 (gjashtëdhjetë e nëntë milionë) lekë.
5. Emri ligjor i Shoqërisë është: Albsig Invest Sh.a - Shoqëri Administruese e Fondeve të Pensionit dhe Sipërmarrjeve të Investimeve Kolektive.
6. Albsig Invest sh.a ka si objekt të aktivitetit të saj:
 - a) Mbledhjen, investimin dhe kryerjen e pagesave për pension të Fondeve të Pensioneve, në përputhje me dispozitat e ligjore, si dhe bazuar në Licencën nr. 5, datë 22.11.2019, të miratuar me vendimin nr. 210 nga AMF-ja;

- b) Krijimin dhe administrimin e Sipërmarrjeve të Investimeve Kolektive në përputhje me dispozitat ligjore, si dhe bazuar në Licencën nr. 5, datë 22.11.2019, të miratuar me vendimin nr. 210 nga AMF-ja.
7. Shoqëria Administruese gjatë aktivitetit të saj udhëhiqet nga parimet e qeverisjes së mirë, prioriteti i interesit të klientëve, integritetit, profesionalizmit, ligjet dhe rregulloret që bien mbi të.
8. Albsig Invest sh.a administron Fondet e mëposhtme:
 - a) Fondin e Pensionit Vullnetar Albsig (Ref. FP 4) miratuar nga AMF-ja me vendimin nr. 210, datë 22.11.2019.
 - b) Fondin e Investimit Albsig Standard (Kodi F1-B5) miratuar nga AMF-ja me vendimin nr. 255, datë 30.12.2019.
 - c) Fondin e Investimit Albsig Selective Equity ETFs miratuar nga AMF-ja me vendimin nr. 76, datë 30.03.2022.
 - d) Fondin e Pensionit Vullnetar Smart Pension miratuar nga AMF-ja me vendimin nr. 96, datë 28.04.2022.

Neni 4

Krijimi dhe Kohëzgjatja e Fondit

1. Fondi është krijuar për një afat të pacaktuar dhe ka filluar veprimtarinë e tij me 14 Shkurt 2020.
2. Prospekti i Fondit është miratuar nga Këshilli i Administrimit të Shoqërisë Administruese si dhe është rimiratuar nga AMF-ja me vendimin nr. 69, datë 28.04.2021.

Neni 5

Monedha Bazë e Fondit

Monedha bazë e Fondit është “Lekë” e cila nënkupton se çdo blerje dhe shlyerje e kuotave do të kryhet në monedhën Lekë.

Neni 6

Objekti i Veprimtarisë së Fondit

Objekti i veprimtarisë së Fondit është grumbullimi i aseteve monetare ose të ngjashme nëpërmjet ofertës publike të kuotave në Fond, të cilat investohen sipas parimit të diversifikimit të rreziqeve në përputhje me Prospektin dhe investitorët kanë të drejtën të marrin pjesë proporcionalisht në fitimet e Fondit, si dhe të kërkojnë në çdo kohë shlyerjen e kuotave të tyre, sipas dispozitave të Ligjit nr. 56/2020, “Për Sipërmarrjet e Investimeve Kolektive” (ne vijim “Ligji”) si dhe Prospektit.

Neni 7

Pjesëmarrja në Fond

1. Çdo person mund të blejë kuota në Fond, duke hyrë në një marrëdhënie ligjore me Shoqërinë Administruese.

2. Shoqëria Administruese llogarit dhe publikon çdo ditë vlerën e kuotës. Llogaritja e vlerës neto të aseteve dhe çmimit të kuotës i nënshtrohet kontrollit dhe verifikimit nga Depozitari, i cili është përgjegjës për saktësinë e llogaritjes.
3. Çdo investitor nënshkruan formularin standard të aplikimit, duke konfirmuar se është njohur dhe ka rënë dakord me kushtet e përcaktuara në Prospektin e Fondit si dhe Rregullat e Fondit.

Neni 8

Investimi i Aseteve

1. Asetet e Fondit do të investohen kryesisht në letra me vlerë të emetuara dhe garantuara nga Qeveria e RSH, në përputhje me politikën e investimit të përcaktuar në Prospekt.
2. Në Fond mund të investojnë investitorë individualë dhe investitorë institucionalë (kompanitë e sigurimit, fondet e pensionit, etj). Kohëzgjatja e rekomanduar e qëndrimit në Fond është të paktën 2 vjet. Fondi është një alternativë shumë e mirë për klientët konservatorë që kërkojnë fleksibilitet të lartë mbi kursimet e tyre.
3. Objektivi i investimit të Fondit është rritja e të ardhurave duke ruajtur principalin dhe likuiditetin.
4. Kohëzgjatja mesatare e portofolit nuk duhet të kalojë vlerën prej 6 viteve.

Neni 9

Investimi Minimal

Shuma minimale e investimit fillestar është 10,000 (dhjetë mijë) Lekë dhe minimumi i investimeve në vazhdim është 1,000 (një mijë) Lekë.

Neni 10

Të Drejtat dhe Përgjegjësitë e Investitorëve në Fond

1. Investitorët në Fond kanë të drejtat e mëposhtme:
 - a) Të kenë pronësinë e kuotave dhe të pajisen me certifikatën e pronësisë;
 - b) Mund të tërheqin fitimin nëpërmjet shitjes së plotë ose të pjesshme të kuotave;
 - c) Të marrin pjesë në fitimet e Fondit, proporcionalisht me pjesëmarrjen në të;
 - d) Të informohen periodikisht (raporte vjetore, gjashtë mujore, etj.);
 - e) Të kërkojnë shitjen e pjesshme apo të plote të kuotave në çdo kohë;
 - f) Të kërkojnë transferimin në një tjetër sipërmarrje investimesh kolektive;
 - g) Në rast falimenti të Shoqërisë Administruese, asetet e tyre të jenë objekt i së drejtës së veçimit.
2. Investitorët janë përgjegjës për detyrimet e Fondit deri në shumën e pjesëmarrjes së tyre në Fond.

Neni 11

Lloji i Kuotave të Fondit

1. Kuotat e Fondit janë kuota akumulimi. Kuotat e akumulimit ri-investojnë të ardhurat nga investimet në mënyrë automatike dhe përfitimet për investitorët vijnë nëpërmjet rritjes së vlerës së kuotave.

2. Shoqëria Administruese bën të mundur që pasqyrat financiare të kontrollohen nga ekspertët kontabël të autorizuar të miratuar nga Autoriteti i Mbikëqyrjes Financiare.

Neni 12

Shlyerja e Kuotave

1. Investitorët kanë të drejtë të kërkojnë në çdo kohë shlyerjen e kuotave të tyre.
2. Investitorët plotësojnë një kërkesë për shlyerje të kuotave në Fond.
3. Shlyerja e kuotave në Fond bëhet me çmimin e zbatueshëm në datën e mbërritjes së kërkesës së vlefshme për shlyerje në Shoqërinë Administruese, jo më vonë se 7 (shtatë) ditë kalendarike nga dita e mbërritjes së kërkesës.

Neni 13

Depozitari

1. Shoqëria Administruese ka lidhur një kontratë me Banka Tirana sh.a, regjistruar si person juridik shqiptar me vendimin Nr. 12718, datë 03.11.1995 të Gjykatës së Rrethit Gjyqësor Tiranë, NIPT J61924008V, me seli në Tiranë në adresën Rr. "Ibrahim Rugova", që vepron si bankë me Licencën nr. 07, datë 12.09.1996 të lëshuar nga Banka e Shqipërisë, e cila në përputhje me Ligjin nr. 56/2020, "Për Sipërmarrjet e Investimeve Kolektive", do të ofrojë shërbimet e Depozitarit për asetet e Fondit.
2. Pjesë përbërëse e rregullave të fondit është Deklarata e Kujdestarisë e Depozitarit.

Neni 14

Kontabiliteti

1. Shoqëria Administruese përgatit pasqyrat financiare dhe raportet e tjera financiare në përputhje me legjislacionin dhe standardet e pranuar të SNRF.
2. Viti financiar për Fondin do të jetë viti kalendarik nga 1 Janar deri më 31 Dhjetor.

Neni 15

Trajtimi Fiskal i Fondit

1. Fondi për qëllime tatimi konsiderohet si pronar i titujve ose i të gjitha aseteve. Trajtimi tatimor i Fondit bazohet në Ligjin nr. 8438, datë 28.12.1998 "Për Tatimin mbi të Ardhurat", i ndryshuar, si dhe aktet nënligjore në zbatim të tij.
2. Të ardhurat që rezultojnë nga diferenca ndërmjet çmimit të shitjes dhe çmimit të blerjes së kuotave në Fond, do të taten, sipas Ligjit nr. 8438, datë 28.12.1998 "Për Tatimin mbi të Ardhurat" i ndryshuar, si dhe aktet nënligjore në zbatim të tij. Zbritja mbahet në burim nga fitimet kapitale nga investimi që realizohen në momentin e shlyerjes së kuotave.

Neni 16

Auditimi

1. Shoqëria Administruese bën të mundur që pasqyrat financiare të kontrollohen nga ekspertët kontabël të miratuar nga Autoriteti i Mbikëqyrjes Financiare.
2. Audituesi i jashtëm i Fondit është RSM Albania AL sh.p.k.

Neni 17

Ruajtja e Konfidencialitetit

1. Shoqëria Administruese dhe çdo punonjës trajtojnë informacionin e klientit si shumë konfidenciale.
2. Të gjithë personat, qofshin punonjës të Shoqërisë, punonjës të Depozitarit, apo palëve të treta, janë përgjegjës për pasojat që rrjedhin direkt nga veprimet e tyre dhe që kanë të bëjnë me keqpërdorimin e informacionit konfidencial.
3. Albsig Invest sh.a është e detyruar të raportojë këtë lloj informacioni vetëm me kërkesë të organeve apo institucioneve që e kanë këtë të drejtë në përputhje me Legjislacionin Shqiptar.

Neni 18

Detyrimet e Shoqërisë Administruese

Shoqëria Administruese gjatë administrimit të Fondit ka detyrimet e mëposhtme:

- a) të administrojë Fondin në përputhje me objektivat e investimit të parashikuara në Prospekt;
- b) të blejë asetet, në emër dhe për llogari të Fondit, duke i depozituar ato te një Depozitar i vetëm;
- c) të organizojë shitjen e kuotave të Fondit sipas procedurave të përcaktuara në Ligj dhe Prospekt;
- d) të shlyejë në kohën e duhur dhe në mënyrë të vazhdueshme të gjitha detyrimet monetare;
- e) të informojë periodikisht investitorët;
- f) të garantojë ruajtjen e fshehtësisë së të dhënave nën administrim.

Neni 19

Tarifat e Shoqërisë Administruese

1. Shoqëria Administruese do të aplikojë tarifën a administrimit, e cila do të jetë deri në 1% (një përqind) në vit e vlerës neto të aseteve të Fondit;
2. Shoqëria Administruese nuk do të aplikojë ndonjë komision hyrje ose dalje nga Fondi;
3. Komisione të tjera përveç tarifës së administrimit që do t'i ngarkohen Fondit janë: komisionet e transaksioneve me letrat me vlerë, shpenzimet për auditimin e Fondit, tarifa e AMF-së, tarifa e Depozitarit.
4. Të gjitha kostot që do t'i ngarkohen Fondit nuk do të kalojnë pragun prej 1.5% në vit.
5. Çdo ndryshim i tarifave që do të aplikohet nga Shoqëria Administruese, do t'u njoftohet investitorëve të paktën 2 muaj përpara, sipas procedurave të përcaktuara në Ligj dhe Prospektin e Fondit.

Neni 20

Miratimi dhe Ndryshimi i Rregullave të Fondit

1. Rregullat e Fondit miratohen nga Këshilli i Administrimit të Shoqërisë Administruese.

2. Rregullat e Fondit i bashkëlidhen Prospektit dhe përbëjnë pjesë integrale të tij.
3. Ndryshimet dhe shtesat në rregullat e Fondit, do të miratohen nga Këshilli i Administrimit si dhe do të marrin miratimin e Autoritetit të Mbikëqyrjes Financiare në përputhje me dispozitat e Ligjit.

Neni 21

Dispozita të Fondit

1. Çdo mosmarrëveshje që mund të lindë nga zbatimi apo interpretimi i këtyre rregullave, do të zgjidhet bazuar në legjislacionin shqiptar, ku kompetente për zgjidhjen e mosmarrëveshjeve do të jetë Gjykata e Shkallës së Parë, Tiranë.
2. Rregullat e Fondit do të hyjnë në fuqi në datën e miratimit nga Autoriteti i Mbikëqyrjes Financiare.

ANEKSI 2: DEKLARATA E KUJDESTARISË

Bazuar në Ligjin nr. 56/2020 “Për Sipërmarrjet e Investimeve Kolektive” në cilësinë e Depozitarit të “Fondit të Investimit Albsig Standard”;

Deklaroj:

Pasuria e Sipërmarrjes së Investimeve Kolektive, do të ruhet nga Depozitari për llogari të investitorëve, duke respektuar parimin e barazisë, në përputhje me numrin e kuotave që zotëron çdo investitor, ose në rastin kur ekzistojnë njëkohësisht si kuota të ardhurash, ashtu edhe kuota akumulimi, në përputhje me pjesën individuale në pasurinë e sipërmarrjes, e llogaritur në bazë të kuotave të zotëruara nga çdo investitor.

Shumat, që ndodhen në llogarinë e parave për t’u shpërndarë, mbahen nga Depozitari vetëm për qëllime shpërndarjeje.

Monedha bazë e Fondit është Lekë.

Viti Financiar i Fondit është viti kalendarik 1 Janar deri më 31 Dhjetor.

Depozitari: Banka e Tiranës sh.a

Dritan Mustafa
Drejtore i Përgjithshëm Ekzekutiv

Eralda Tafaj
Drejtore i Operacioneve

Tiranë, 28.04.2021



ANEKSI 3: FORMULARI TIP I BLERJES SË KUOTAVE NË “FONDIN E INVESTIMIT ALBSIG STANDARD”

INFORMACION I RËNDËSISHËM:

- ✚ Çdo investitor duhet të lexojë dhe të kuptojë Prospektin dhe Rregullat e Fondit përpara se të kryejë investimin në Fondin Albsig Standard.
- ✚ Dokumentet e nevojshëm që duhet të paraqiten nga investitori janë: a) karta e identitetit/pasaportë e vlefshme, b) numër telefoni, adresë e-maili apo adresë vendbanimi.
- ✚ Investimi juaj do të konsiderohet i realizuar me mbërritjen e pagesës në llogarinë e Fondit pranë Bankës Depozitare, Banka Tirana sh.a, me Nr. Llogarie: AL49 2061 1004 0000 1003 2129 9100.
- ✚ Investimi i klientit do të konvertohet në kuota duke zbatuar çmimin e kuotës në datën e mbërritjes së pagesës në llogarinë e Fondit pranë Bankës Depozitare. Çmimi përlllogaritet në përputhje me Ligjin nr. 56/2020, “Për Sipërmarrjet e Investimeve Kolektive” dhe aktet nënligjore në zbatim të tij.

Anëtari i Fondit të Investimit

Emër Atësia Mbiemër: _____; Nr. i Dokumentit të Identifikimit: _____;

Adresë: _____; Ditëlindja: __/__/____; Vendlindja: _____;

Tel./Mob: _____; E-mail: _____; Shuma e Investuar: _____;

Mënyra e Pagesës: _____; Burimi i të Ardhurave: _____

Adresa e Korrespondencës: _____;

Nr. i Pasaportës (vetëm për shtetasit e huaj) _____;

Nr. i NIPT-it: _____ (vetëm për personat tregtarë të regjistruar juridikë apo person fizik);

Shuma e Investuar: _____ EUR; Mënyra e Pagesës: _____

Burimi i të Ardhurave: _____

I Punësuar Pranë: _____, Pozicioni i Punës: _____

Mënyra e Investimit:

Pagesë në një shumë të menjëhershme.

Plan Investimi. Frekuenca e zgjedhur e pagesave: Mujore; Tremujore; Tjetër-
Specifiko _____

Kohëzgjatja e Parashikuar e Investimit:

DEKLARATË E INVESTITORIT:

Unë deklaroj, se kam marrë, kam lexuar dhe kuptuar si dhe kam rënë dakord me Prospektin, Rregullat e Fondit dhe Informacionin Kryesor për Investitorin (KIID).

Deklaroj, se kam lexuar, kuptuar dhe plotësuar pyetësonin e rrezikut dhe jam njohur me profilin tim të rrezikut. Jam i vetëdijshëm që ky lloj investimi nuk është i garantuar. Nënshkrimi i kontratës së investimit nënkupton hyrjen në një marrëveshje ligjore me Albsig Invest sh.a. Ky investim është bërë vetëm sipas dëshirës dhe gjykimit tim, dhe se jam në dijeni dhe kam kuptuar të gjitha rreziqet e përfshira, tarifat që lidhen me blerjen dhe shitjen e kuotave në Fondin Albsig Standard dhe me gjithë kushtet që shoqërojnë këtë marrëdhënie. Kuptoj se të dhënat e mia personale, të dhëna në këtë kontratë apo në çdo formular tjetër të nënshkruar nga unë janë të dhëna të detyrueshme, të cilat do të përpunohen nga Albsig Invest sh.a me standardet më të larta të sigurisë dhe konform parashikimeve ligjore në fuqi, vetëm për qëllimin e ofrimit të produkteve ose për të përmbushur një detyrim ligjor që Albsig Invest sh.a mund të ketë, bazuar në aktet ligjore dhe rregullative në Republikën e Shqipërisë. Kuptoj që është detyrim i imi t'i përditësoj këto të dhëna, sa herë që do të ndryshohen. Deklaroj se jam njohur me faktin se kam të drejtë, që në çdo kohë, me anë të një kërkesë paraprake me shkrim, t'i kërkoj Albsig Invest sh.a, që të korrigjojë, apo të fshijë të dhënat e mia personale.

PËRPUNIMI I TË DHËNAVE PERSONALE:

Deklaroj se informacioni i dhënë nga ana ime në këtë aplikim është i vërtetë dhe i saktë. Unë shpreh pëlqimin tim që Albsig Invest sh.a, të mund t'i përpunojë të dhënat e mia personale të plotësuara në kontratë apo formular vetëm për qëllimin e ofrimit të shërbimit për të cilin po aplikoj. Kuptoj se çdo e dhënë personale lidhur me personin tim do të trajtohet me një nivel sigurie të standardeve me të larta në përputhje të plotë me parashikimet e Ligjit nr. 9887 datë 10.03.2008, "Për Mbrojtjen e të Dhënave Personale" dhe akteve nënligjore të nxjerra në zbatim të tij.

Deklaroj dhe jap miratimin tim për procedimin e mëtejshëm të të dhënave personale nga ana e Albsig Invest sh.a, duke i transferuar këto të dhëna drejt palëve kontraktore, të cilat mund të jenë në cilësinë e përpunuesit në kuadër, të çeljes, mirëmbajtjes dhe administrimit të llogarisë. Në këtë kuadër, jam njohur me faktin që të dhënat e mia personale i transferohen subjektit Banka Tirana sh.a në cilësinë e Depozitarit të Fondit bazuar në Ligjin nr. 56/2020, "Për Sipërmarrjet e Investimeve Kolektive", subjektit Shoqëria e Sigurimit Albsig sh.a në mënyrë që shoqëria të ushtrojë vigjilencën e duhur si edhe të zbatojë detyrimet e tjera që burojnë nga legjislacioni në fuqi në fushën e parandalimit të pastrimit të parave.

Autorizoj në mënyrë të shprehur Albsig Invest sh.a, që të ruajë të dhënat e mia personale për një afat deri në 11 vite pas mbylljes së marrëdhënies së biznesit mes meje dhe Shoqërisë. Jam njohur nga Shoqëria me faktin që për çdo pyetje apo informacion lidhur me mënyrën e përpunimit të të dhënave të mia personale kam të drejtë të dërgoj e-mail në adresën elektronike: info@albsiginvest.al. Gjithashtu në çdo kohë ruaj të drejtën për t'u ankuar tek "Komisioneri për të Drejtën e Informimit dhe Mbrojtjen e të Dhënave Personale", dhe ruaj të drejtën për t'u tërhequr nga dhënia e pëlqimit për përpunimin e të dhënave.

Miratim për përpunimin e të dhënave personale në rast ofertash promovionale:

Jap miratimin tim të pakushtëzuar që Albsig Invest sh.a, të përdorë të dhënat e mia personale për qëllimin e përfuturit nga ana ime të ofertave promovionale, si pjesë e paketës së produkteve dhe shërbimeve që Shoqëria ofron apo do të ofrojë në të ardhmen, nëpërmjet një ose disa kanaleve të informimit. Në këtë kuadër autorizoj Albsig Invest sh.a, që duke respektuar standardet më të larta të sigurisë, si dhe bazuar në dispozitat ligjore dhe rregullative në fuqi, të delegojë përpunimin e mëtejshëm të të dhënave të mia personale, duke i transferuar këto të dhëna tek palë të specializuara për këtë qëllim. Gjithashtu, deklaroj se jam njohur me të drejtën që në çdo kohë të kërkoj nga Shoqëria revokimin e këtij miratimi.

- Unë pranoj
- Unë nuk pranoj

Investitori
(Emër Mbiemër/Firmë)

Për Albsig Invest Sh.a
(Emër Mbiemër/Firmë/Vulë)